


明分省人物考 十三十三




漢書門			
八	九	五	類
六	九	號	
四	二	函	
冊	架	冊	

內閣文庫			
六	八	五	漢
七	九	號	書
函	六	冊	
二	四	架	

內閣文庫		
番號	漢	8985
冊數	64	(8)
函號	287	161





天物考卷之十二目錄

南直隸應天府二

吳日

淺草文庫

倪岳

任彥常

都勝

王徽

沈鍾

金澤

吳昊

莊泉

陳鎬

薛端

附弟欽

王敞


吳文度

陳鋼

楊銳

劉璽

邵清



李重

史學

張諫

湯鼎

張鰲

徐珪

張琮

顧璘

金達

梁材

李熙

黃宏

朱衣

李登

顧瓌

顧國輔

鄭宣化

吳自新

本朝京省人物考卷之十二

南直隸應天府

倪岳

倪岳字舜咨上元縣人南京禮部尚書謙之子天順

甲申登進士入翰林院庶吉士授編修預修英廟

實錄秩滿遷侍讀被命編緝文華大訓成化十八

年書成進翰林學士二十二年拜禮部侍郎憲宗

賓天充山陵使山陵禮畢神主將升祔於制當祧廟

下禮部集廷臣議或以德祖以下四廟以次當祧

岳以此非太祖崇本尊親之意昔周公追王太王

王季又祀先公以天子之禮其意蓋出於此國家自德祖以上莫推其世則德祖乃周之后稷也不可祧懿僖仁三祖以次當祧至太祖太宗爲周之文武百世不遷今憲宗升祔當祧懿祖一廟宜於太廟寢殿後建藏祧主之所如古夾室之制每歲暮則奉祧主合享亦應古祫祭之制時又有言孝穆太后當祔廟者岳言周之姜嫄爲帝嚳次妃后稷之母故周禮有享先妣樂舞蓋指姜嫄而魯頌閟宮之詩特見其名此別廟之明證也且唐以來皆有故事可考孝穆神主宜於一奉先殿旁立廟祭享一

如奉先殿之儀奏上悉從之孝廟初卽位言者全集皆下禮部議擬稿多出岳手遂釐正京師諸神祠凡不經訓典者裁革殆盡時議者又欲改定孔廷從祀岳言馬融王弼之徒立身不無可貶然秦漢以來六經出於煨燼賴諸子抱遺經專門講授經以復存何可盡廢七十子名氏自司馬遷以來相沿已久今千百年後何可臆定宜仍舊弘治元年進左侍郎時以災異求言岳同尚書耿裕疏寅畏天戒七事未幾復陳八事大意謂當今財匱民貧務宜節儉以爲天下先又言天下之土地有定而宗室之封制日

增更數百年又將若何至設官分職所以爲民近司銓者以添官爲疏通故額外設官甚多民安得不困均宜以時裁約又言減齋醮省供應罷營繕數事上嘉納焉宗室冗官二議雖格識者韙之二年撒馬兒罕差人進貢岳具奏海南諸番國惟占城真蠟暹羅滿刺加國瓜哇等處入貢有勘合者例起送赴京其餘不許起送今撒馬罕差人進貢自合諭以朝廷事例并請旨阻回爲當如果夷性執拗不從亦合以理阻留星馳具本候請明命却乃擅自起送入京合當參究上從其言差官阻回不受獻六

年進禮部尚書勸上勵精以勤聖學推誠以開言路止無功之賞停不急之後黜奸貪進忠直時有旨召番僧領真等入京岳言以西番腥羶之徒汚中華禮義之教其獻頂骨數珠進骷髏法碗名曰祝聖實爲妄誕皇上首賜罷黜中外稱聖今欲行取來京本部查無取番僧國師例必須創始而行事有未便且四川離京遠轉相傳報驚駭騷繹於皇上初政之清明不無少損時西域胡人從海道進獅子岳言外夷之獸真僞不可知使真非中國所宜畜非真豈不爲外夷所笑且海道亦非西域常貢之路有

旨還之時 太皇太后思憶 崇王欲得一見有旨
寫 勅差官取來岳極言其未便者三近傳黃河泛
漲水高於岸洶湧異常 王欲來朝乃舟楫必經之
地保護之責誰敢當之未便一也兼聞河南彰衛二
府自春徂夏一雨不霑赤地千里夫馬艱窘不言可
知 王欲來朝乃車馬必經之地不獨供億之費無
所給萬一盜賊乘時竊發保護之責又誰當未便二
也况二年之間 三王之國所過郡縣十分騷擾民
不聊生今若加以 崇王來朝送往迎來勞費增倍
瘡痍之民何以當此未便三也况奉 命來朝雖小

遂一時欲見之心然欲別則難計必眷戀不捨憂思
倍增他日上厯 聖慮所未敢言雖欲悔之無及矣
疏上奉 旨免來岳力居多弘治九年改南京吏部
尚書太子少保時議謂不宜處之散地會考覈在京
諸司岳所黜罷者若干人衆稱明允十二年春因灾
異率九卿陳言二十八事多見施行本年改南京兵
部尚書叅贊守備修舉兵政疲弊盡剗十三年召拜
吏部尚書岳善知人凡用人之際羸縮弛張各當其
材大要以抑僥倖褒恬退振淹滯爲主故除目一下
中外稱快謂數十年來未有也中貴逆真武像於武

本朝文獻通考 卷一百一十二
四
當山道路騷然岳復倡諸大臣抗疏諫止以弘治十
四年十月九日終於京年五十八計聞上賜寶鏹
萬緡爲治歛具贈少保謚文毅岳狀貌魁異有文武
大畧事當廷議每片言而決天下皆仰其風采獨在
翰林時太監黃賜母死衰服送葬論者謂其急於功
名昵比權要君子蓋深惜焉

任彥常

任彥常字吉夫別號克齋學者稱曰克齋先生其先
廬州合肥人國初屬籍南京江陰衛遂爲金陵人幼
遊京庠刻苦有志蒐獵羣書爲文章辭理並到天順

壬午以葩經試京闈大學士博野劉公典文衡見其
卷驚曰此奇才也拔置第一人梓行其文及揭曉物
論以爲允當壬辰第進士授南京戶部貴州司主事
陞廣東司員外郎中又明年陞福建按察司提學僉
事體恤士類甚得其心弘治紀元致仕歸入府師生
遣人赴京保奏保連一十二章不報從容林下十有
二年而歿所著有克齋稿若干卷

都勝

都勝字廷美其先河間寧津人父忠以蔭改南京羽
林左衛指揮僉事生勝年十五入武學讀書綴文與

儒素等江東名士樂與之遊守備大臣聞之俾守上元門有以私貸屬者立寘於法衆益賢之遷大教場管軍操備天順己卯委管把總舍人營改都總操江擒獲鹽徒劉奮子丙戌奏委把總南京漕運興革利弊軍便事集丁亥用大臣薦陞都指揮僉事戊子奉勅守備儀真軍務嚴整盜賊屏息而廉慎詳密百廢具舉真民畏愛之壬辰奉勅兼管揚州高郵地方癸巳春鹽徒金藩等犯嘉定上海奉勅兼管備倭賊徒聞之散去是年冬賊徒復乘巨艦數百欲犯江陰率衆捕獲之俘獻於朝丁酉年奉勅充叅將協同漕運

仍鎮守淮安地乙巳山陝饑奉勅運米百萬餘石往濟之尋奉勅陞署都指揮使掛印充總兵官提督漕運兼鎮守淮安丁未冬陞都督僉事銓註中府屢疏乞休致不許優荅之弘治甲寅懇乞骸骨以南京前府帶俸閒住在官五十七年所在懋著聲績爲時名臣己未冬卒於家賜祭葬如例勝居官廉潔臨事恪慎歷官六十餘年自奉甚儉日惟蔬食豆羹而已


王徽

王徽字尚文辣齋其號也其先河南考城人國初隸錦衣衛始爲南京人天順丁丑舉禮部進士以外艱

歸庚辰始廷試對策數千言援據古義論及時事讀
卷者擬及第都御史寇琛嫌其語直抑寘第二甲第
三人選庶吉士試春雨詩倣栢梁體頃刻賦百餘韻
李文達王忠肅相顧幸得人會詔限年以選乃不與
兩公甚惜之除南京刑科給事中 憲宗皇帝初臨

經筵兼講通鑑綱目無所隱諱朝夕取為法戒諫官
之言有可採者乞戒有司勿廢滯權倖者不得假托
以中傷之選任大臣宜隆禮貌大罪不可宥小過不
可辱庶人知自重而名器尊近年將領多以私暱進

繇本兵者非其人先黜尚書白昂擇人以進退之則
將可得最後言禁近之臣宜悉遵舊制使無他與否
則始雖愛之及其敗而治之非保全之道其言尤備
上皆嘉納之踰數月適中貴人謫至南京徽諭其故
倡同官曰是可輕貫乎操筆具疏一日而就一曰明
刑罰以正朝綱二曰監往事以防後患數其大不韙
之罪四乞寘諸法因指斥執政者之不職曰必如是
斯可以善後奏入聞者皆為震懼有欲以危法中之
者給事中御史爭上草論採賴 天子仁聖仍其秩
俱調遠州判官徽得普安州普安貴州遐方也比至



興學諭俗其習稍變始有舉於鄉者土官龍塞死子當襲族人爭之賂以數千叱去不納即日勘任之白千戶者富而虐卒訴之獄數年不決卒詣都御史曰須王判官來乃白千戶先以生魚數頭假廩人以入曰若地無魚其出白氏乎却之按其諸不法者竟抵其罪判七年秩將滿父老上書留爲守都御史不聽去之日遮道泣送焉歸南京卽請休致尚書尹公旻曰給事望重它日人究出處責在我矣請不已以例聽歸十有三年弘治初王端毅居吏部薦拜陝西左叅議分蒞延安墾田均徭民平邊給踰年忽有所不

樂遂謝病歸當路於陝者爭留之而堅不可奪已時年六十有三也徽天資超悟刻意問學考古今成敗治亂務求其要自諸生時已慨然有當世志孫御史鼎馬府尹諒皆奇之京兆特月給緡錢爲學舍費及居言路冀以次論列天下事一再言遽被謫故天下士誦其言者皆高其識壯其直一時侍從臺諫相繼疏留者至十數上不已自陝歸杜門不出聲聞益重名碩之士多以公傳擬之論治每誦張宜公語無求辦事之人當求曉事之人論士習惟以廉耻不修奔趨日下爲極可憂嘗曰今仕者以剛方爲刻怠緩爲

寬學者以持正為滯恬軟為通文者以典雅為膚淺
恠刻為古健皆後生所宜深戒聽其議論無不咨歎
歛服者文章師韓歐詩倣王維劉長卿筆札遒勁鑒
別古器若書畫尤稱精博有辣齋稿史疑引笑集若
千卷傳於世子韋以進士選授庶吉士改南京吏部
考功主事賢而有文其孝友慈恕百務整悉忠信明
決人莫敢欺蓋得諸家教者有素故始終人無間言
焉

沈鍾

沈鍾字仲律其先長洲人洪武中徙閭右實京師占

籍上元鍾生岐嶷絕羣為應天諸生惟堂鼓鳴乃一
出舍古聖賢書諸史無不讀者所業不苟狗舉子時
好天順庚辰登進士會選科道不赴曰恐言未足利
天下授驗封主事請便母養改南客司扁所居齋曰
思古日讀書其中倭人入貢嘗奪人市物鍾給賞至
禁之無敢登岸署司儀制值萬壽聖節六卿例一
人奉表賀時章恭毅為禮部侍郎有所執論莫肯行
同官無可否者鍾從容一言即為趣裝崔莊敏公為
冢宰時知其名欲見之屢從借書鍾但檢付而已卒
未嘗往見崔益重之與章公懋羅公倫輩相友善時



有十君子之號陞山西僉事提學內艱起仍舊秩除湖廣理刑秩滿遂擢副使提學尋督學山東歲餘上書乞休致不許因號休齋以見志書再上乃得報即日南歸年五十七鍾坦易不事表曝家之有無一切不省孝友天植官資入必跪進太安人不寘私篋仕餘三十年一無所干謁西涯李公嘗謂今之不識相門者沈仲律一人耳直道性成至接人則和氣藹然聞人善稱道不置雖不解飲酒燕會未嘗不終提學三省身教大行故一時多實材所至詩成輒大書適勁盈紙竟壁無傾斜在江夏居間校古今名集時有

批評客至語世務憂形於色忌辰齋祭老猶號泣如嬰兒云享年八十有三所著有思古齋集有晉陽楚遊等詩集若干卷

金澤

金澤字德潤江寧縣人中成化丙戌進士七年授刑部主事陞員外郎中讞獄明允十三年丁憂服除補南京兵部職方司郎中陞四川右叅議尋陞叅政播州宣慰司厚饋以金幣毅然麾之有庶長奪嫡者竟寘之法革三長官司撫安七十二寨夷民駢首歸命流賊李廣蝟聚五千餘人戮通江官吏傾其帑藏東

鄉王伯榮效尤犯順焚蕩縣治澤前後設畫偵其渠
魁而殲之銅梁新設民多負固撫循有方人咸帖服
夔賊野王剛鼓衆猖獗搖震湖陝 上命三省督兵
會勦澤下重賞之令竟磔剛於市弘治五年陞廣東
右布政使七年轉左時汀漳盜起郡縣有司因循不
急捕其勢寢熾而嶺南湖湘之不逞者從而和之四
散剽掠劫富室燔民居掠帑藏殺官軍闖然爲東南
郡縣患有司始駭而圖之備東掠西騷繹愈甚時會
議以爲盜之未平由政令不一而鄰境有司不肯協
心故也宜設巡司憲臣置司要地以節制之而割附

近郡縣以隸之則盜易平具奏其事得旨陞澤爲都
察院右副都御史俾巡撫江西澤先榜令自首者釋
罪因嚴爲督緝捕斬賊首滿天明等八百餘顆論功
罪明賞罰人多感奮思效徭徠洞蠻聞風向化四邊
以寧又因四省交錯緝捕官員責不專一每有警報
事難責成奏行州添判官縣添主簿各一員並不別
差專委操練機快緝捕盜賊遇有緊急可以責成又
瑞金縣招集鄉去縣六十里僻在一隅俱係深山險
洞林木森陰爲盜賊藏匿之藪奏於湖陂山塲設立
巡檢司一所設立關隘僉編附近居民之壯者防守

要津禁遏奸細又增高贛州舊城一尺并信豐興國等處舊城崩圯者俱檄修葺凡百政令皆可行之久而無弊十二年陞南京刑部右侍郎尋以兵部右侍郎遷南京右都御史掌院事正德元年致仕

李昊

李昊字志遠先世崑山洪武初以間右占籍上元成化己丑進士忻穆王出閣詔選講讀官除昊翰林檢討侍王左右昊於訓詁之外敷陳諄愷王甚重之有小疾輒遣中官問遺甫四月卽爲昊父母請封旣得請以上尊文綺致賀皆異數也改南京禮科給事中

丁內艱服闋補工科秩滿陞浙江叅議昊在言路因黑青之異力陳時事當罷行者及勘遼東軍餉覈侵牟補匱乏遼人稱之浙江值紹興水災民饑告病特寬其逋負湖州改朔孝豐縣營治朔建霍然一新嘉興百戶陳輔以衆劫府庫分捕擒之尋以外艱歸遂請老以坦拙自號退然不求榮進以壽考終於家

莊杲

莊杲字孔暘江浦人世稱定山先生中成化丙戌進士任翰林院檢討上欲設鰲山燈杲同編修章懋等上培養君德疏忤旨調湖廣桂陽州判未行用給事

中毛弘御史陳莊言改南京行人尋遭二艱服闋不起巡撫王恕訪於定山欲以白金十五鎰理其敝廬
 景曰受官辦以理私廬可乎卒不受弘治甲寅被薦
 召用巡撫何鑑躬詣勸駕入京謁吏部三揖不跪冢
 宰耿公裕起延之以茶令四司送出部門景曰第令
 不失已官職外物耳吏部題復行人司副西崕語吏
 部曰留都根本之地定山還當官此陞南京吏部驗
 封司郎中到任十二日偶病遷延野寺越明年考察
 註以老疾乃景告去已改歲矣生平持身慕伊川法
 度接人慕明道和氣嘗曰天生聖賢為世道計也孔
 子六經諸子傳註喚醒聾聵所以引其不及者至矣
 今世降風移學者泥於聞見至淪胥以溺非制其過
 可乎故進而當行道也吾義所安不違道以干譽退
 而當明道也吾志所存不立異以求名所著有定山
 集雅好為詩趣多自得不獨踵唐人風格詩之變自
 景始

陳 鎬

附弟欽

陳鎬字宗之系出會稽大父嵩以通天官學徵赴南
 京占籍欽天監賦質卓穎以文行聞成化丙午鄉試
 第一丁未成進士授禮部主事乞便養改南吏部郎

中晉山東提學副使校閱精覈公廉詳慎終始如一
輯洙泗誌振發士習諸生感其風誼興起成就者甚
多齊魯間稱名督學必首推之晉江西叅政庚午晉
湖廣布政使會漢沔盜起流劫郡縣貧民蟻附徒黨
日衆鎬設方略督官兵以次討平之餘賊未盡卽晉
右副都御史巡撫其地鎬曰良民可驅而爲賊顧不
能還賊爲良民乎於是移檄諸郡脅從者不治歸化
者占以原籍湖湘素服其威信見檄卽盡散歸農湘
江安堵壬申以疾乞歸命未下而卒所著有矩菴漫
藁金陵人物志行於世弟欽字諒之蚤負文譽與鎬

齊名鄉會試皆與兄同登人榮羨之授南武選主事
署選軍政秉持清正峻拒請托豪貴者咸思中之會
武庫郎婁性被誣下獄同部莫敢暴白欽獨奮身疏
其冤狀 詔并逮獄同繫者二年婁病日深朝夕調
護得以不死久之婁獲免而欽以此名聞天下出知
廣平洞達民隱臨事果決至則風裁蹕厲百廢具興
以時巡行屬縣問民疾苦廉有司賢不肖而勸懲之
有望風解印去者郡人號爲陳母弘治乙丑入計以
卓異被宴賚尋晉廣東提學副使條教甄別士方嚮
風竟以疾卒欽嚴毅方正所與游必當世名士於物

本朝分省人物考 卷十一 十四
非其義不取服官二十年樸素一如寒士司寇顧璘刻其自菴集四卷海山聯句集四卷行於世

薛端

薛端字士莊先世河南孟津人洪武初年分設軍衛隸籍留守左衛子孫遂家於金陵端生而秀異白晳瑩然如玉當成童時叅將袁公佑方爲衛帥一見而奇之曰是兒狀貌異常豈宜屈於凡流促令業儒未幾補京庠生學日加進領成化辛卯鄉薦尋丁父憂太原周公嘗延端授子弟經學至是陞刑部尚書與端居比近屢致問竟不往謁其守禮之確如此服除

以戊戌乙榜授山東莘縣教諭莘俗士子好訐把持武斷久乏科名端至舉其甚者一人呈學使者置於法風始稍息乃擇其英杰者十餘輩躬督之學居任五年中式者凡數人陞南京國子監博士甲寅陞岷府右長史以正匡導不稍比昵王嘗宴羣臣令各歌唱侑觴端曰臣待罪輔相恒懼迂鈍有孤簡命違暇習歌唱耶王肅然改容賦詩以彰其直尋晉左長史引疾歸武宗卽位進中順大夫服緋帶金俄以疾終得年六十有九

王敞

王敞字漢英號竹堂其先居浙之西安洪武中以尺籍隸錦衣衛遂爲南京人敞少警敏爲應天府學生有時名成化辛丑中會試第三人授刑科給事中出閱四川建昌松藩諸鎮邊儲稽處有法軍餉賴焉還上便宜六事其一言建昌往時歲起礦夫若干今事旣革而夫尚爲權家所占請罷從之丁未陞工科右給事 孝宗踐祚賜一品服使朝鮮其國王令陪臣出女樂燕之敞曰 天子在諒陰中吾何忍聽此其君臣相顧媿嘆還陞都給事中奏減兩京內府柴薪又奏以各科所積柴薪餘銀助修六科朝房工費凡

奏疏上輒毀其稿曰吾職當爾寧以是沽名也乙卯補通政司右叅議丁巳進左戊午陞通政使初天下章奏皆諸吏分掌出納得緣爲奸至是置大櫃列後堂親封鑰之弊遂革戊辰陞兵部左侍郎尋陞尚書敞以本部任重勤謹益甚每選官必語其屬曰此祖宗報功盛典母事深刻寧過于厚可也武功黃選簿在內府印綬監凡遇除選必入內查對輒爲所難例納賄乃得如期對視請膳副於部以便選法命兼提督京營戎務賜蟒衣玉帶以平寧夏功加太子太保廕子錦衣百戶山東及四川盜繼起請增設諸要地

兵備定賞罰條格分令巡撫官嚴督軍兵以時操練所用諸將官及總制大臣皆極一時之選辛未賜麒麟又賜彩敕衣敞以盛滿爲懼乞休疏上者凡七乃得旨允歸歸則日與朋舊賦詩爲社篇章傳播一時人指目以爲香山洛社年六十有三而卒

吳文度

吳文度字憲之其先福之晉江人父某教諭黃梅以疾就醫南京遂家應天府之江寧文度早孤與伯兄居抗志力學成化己酉舉鄉試登壬辰進士授浙江龍泉知縣龍泉故號難治文度招集父老示以禮義

其強梗者治以法境內肅然己亥徵拜南京監察御史秉持風采多所建白丁未擢知汀州府時徭人出沒爲患文度設方略招致賦役帖然以寧以其餘力修舉學政考德問業親篤勸之人才翕然以變弘治戊午擢江西布政司左叅政壬戌進山西右布政使閱歲轉河南左布政使力專才贍一時弊政釐革殆盡下和買之令禁無名之役人至於今稱之乙丑拜都察院右副都御史巡撫雲南屬夷酋阿本負險稱亂文度至撫先文告猶弗率乃進師親臨行陳擒其渠魁地方大定夷民納貢賦如中土捷聞降勅獎

諭賜與甚厚正德戊辰擢戶部右侍郎尋轉左侍郎未幾拜南京右都御史逆瑾用事索賄文度弗應是歲十一月改南京戶部尚書致仕文度既退蕭然深居澹恬容與無異韋布時知已過從輒治饌具飲宴盡歡達官貴人至則避不見久之逆瑾敗諸所嘗傾害者朝廷次第收復之士論多屬文度召命且下而以疾遂不起壽七十二所著有文石稿若干卷行於世

陳鋼

陳鋼字堅遠其先本建安人國初有名瑤始以醫徵籍太醫院遂家南京鋼少而穎異父教之學醫鋼獨愛讀儒書族伯都憲公濂勸其父遣之從儒遂舉成化乙酉鄉試進士不第授黔陽知縣鋼性豈弟治事通大體初至縣稽民丁稅多寡均定徭役招復流離闕磽田數千畝給無業之民置養濟院衣食無告積義倉粟俾民不怵荒歲省刑抑訟杜吏爲奸居一年庭無煩冤野無凍餒鋼曰民可教矣乃置社學修孔子廟興孝弟禮義之教楚俗居喪擊鼓夷歌乃諭歌古哀詞如蒿里薤露等歌民知嚮風父老語子弟曰微陳公汝其終于夷乎鋼曰民可後矣沅湘二江合

流縣城下數決壞民居鋼作小舟數十舸募民采石
甃堤自南門抵西門亘千丈水乃不溢縣南山間有
三里厓路狹甚石堅不可鑿長沅諸路軍往戍靖州
夜每墮崖下死鋼督郵兵積薪烈之淬以醪醢拓廣
其路文許外繚以索行者不害掘地得古義士張捍
碑及宋令饒敏學寶山書院碑乃建書院於赤寶山
下祀二公於後寢將圖新縣治忽大水漂木數百至
乃底績又建面山草堂休沐讀書其中以考得失凡
興作民如子來知以佚道使也鋼病民憂惶禱神雖
老羸者亦拜稽竟日曰願以餘年報公病愈過市婦

女子望之皆曰公貌得無少損邪鄰縣猺夷與民爭
田不決監司檄鋼往開譬切至咸踴躍服鋼嘗過他
縣道旁小兒黏雀爲嬉問知鋼名兒相顧曰公必惡
我等戕物命悉縱雀去官滿當代民上狀乞留監司
不許將行駕小舟送於江者數百里爭獻蔬菓每品
取少許還之殺羊豕設祖道人人頌惠無不扳車泣
留者歸爲立生祠豎去思碑曰以無忘仁人於世世
拜長沙通判察吏民所苦苛禮冗費悉刊除之決疑
獄出寃民民祠於家監修吉王府程工節用倍省其
費王嘉其忠廉屢賜金帛皆謝不受議復岳麓書院

初渡江有僧來迎鋼曰安知迎予僧曰夕夢緋衣使君來訪書院故址是以來比掘砌得故甃識曰陳某造適同鋼名乃白吉王得故殿材成之祀晦菴南軒二公於中弘治丙辰奔繼母喪歸得疾卒長沙人聞之無不泣下乃請諸監司從祀於岳麓書院鋼居長沙黔人歲遣子弟一人來問安黔人聞其卒皆痛哭罷市至今長沙與黔人來南京者多就其家乞其像拜哭之弟鏡官終武昌通判以廉謹聞子沂官翰林侍講文學行誼並有聞於世

楊銳

楊銳字進之其先徐之蕭縣人正統間以功進南京羽林衛指揮歷數世而銳嗣其官正德四年總江西十二衛所儲運艤艘聯屬運無後期凡八年進署都指揮僉事奉 詔守備九江安慶諸郡駐軍皖城九年盡獲江賊於蓮花洲監司喜以事 上聞銳曰江賊奚足憂所虞者豫章耳意指寧濠也又謂九江爲鄱陽上流最爲要害當置戍於湖口縣之高嶺可以遠望有警可卽達也乃繪長江圖具事標識凡數本呈司馬重臣及臺院司江防者又請造戰艦若干艘習水戰於江上十一年與臺院密議兵食繕皖城周

城中多浚井十四年寧濠變作卽告變京師先引軍設鈎距於江側禁勿泄及寇船二百餘艘抵岸爲鈎距所破繼至者以千數銳坐城上與衆誓勦逆賊告郡守發府庫金懸以示賞有寇衣緋者稱凌十一先登銳引弓中其首其子繼登貫其吭而死於是懦者皆起城上建大旗書勦逆賊以壯士氣有安慶人僉事潘鵬持黃紙擁騎至城稱後兵數十萬能以城降得不死銳語鵬曰汝死已後尚覩顏爲悖言乎吾刃至矣捕鵬家一人腰斬棄城下鵬乃遁去寇爲敵樓數仞俯瞰城中有甲冑者持鈎距大呼銳發矢中左

腋藥火齊發頃之樓燬死者不可計八日宸濠船泊南岸聞不克大怒率衆分攻五城各舉木爲蔽銳裂方布覆紙裹藥火千數散投所蔽木上火發盡棄走火光周匝不絕寇無所遁十二日寇結木爲棧與城接挾兵而進城中大驚銳乃詭以大將軍火鏡寶石被緋衣金鼓置城上向寇兵望見大潰潛使一卒從間道出燒棧絕其餉道十六日寇衆解體且暑溽力憊夜皆鼾睡銳募善泅者數人於船中聞鼾聲卽斬首絕其纜放之江中又遣一二強卒突入岸上營舉火礮城上應之乘勝捕殺聲震數里是夜宸濠浩歎

出涕而返及奏捷 武帝下璽書褒之賜有忠勤報
國戰守奇功二榜實授都指揮僉事充叅將仍守安
慶兼湖廣等處銳疏舉鄭岳胡世寧皆以拒濠譴者
濠既平論功進爲左軍都督府僉事廕子平爲羽林
千戶又疏舉御史楊必進嘗與謀於未變時者廷臣
賢之嘉靖元年以三關弗靖移守保定諸郡授驃騎
將軍四年 詔還京師旋以母老乞歸養改南京右
軍都督府八年授總兵官鎮守遼東至鎮秋毫無犯
士卒思奮九年改漕運總兵官鎮守淮安明年忌者
有言乃罷歸又明年以疾卒銳自立官足不及權門
身歿囊無一錢諸子鬻衣爲葬

劉 璽

劉璽字廷守南京龍驤衛人博雅閑將畧爲提學御
史陳琳器重襲世職卽以才能選視龍江右衛軍政
未幾遷撥船廠把總璽以清慎勤蒞之無不肅然薦
陞南京旗手等衛把總運糧值 武廟時江彬用事
以勢迫索運船之利瀕死不從臺諫累薦奉 勅守
備浙江溫州等府到任卽清宿弊訪民瘼郡人大悅
兩越月總督漕運陶琰特奏溫處一隅漕運重務必
得璽乃可拯江西儲運之弊陞江西都司江西自宸

濠之亂糧稅越歲不完璽盡心區畫得以底績復條
 陳巡撫中丞請依期給糧以卹軍士清衙門宿弊以
 杜奸宄革吏民入司之公罰除衛所冊文之扛解請
 廢府之餘材以立官衙出城濠之租稅以歸公府善
 政美意不一而足時祿入猶薄自處有寒士所不堪
 者士林因有青菜劉及劉窮之號當道者亦以上聞
 王守仁以總制經江西一見卽重之奏取副叅 命
 未下而守仁卒奉 勅充叅將協同漕運兼守淮安
 銓注錦衣衛卽有議處船糧以免凍阻等疏皆議行
 言官累薦充總兵官提督漕運鎮守淮安奏增餘丁

月糧定考課以裨軍政明漕規以一衆心疏濬江南
 河道以濟糧運折兌山縣糧米以免稽遲凡三十餘
 疏至今爲漕政良規復患淮楊河道淤淺奏起四府
 丁夫開濬功成 詔賜白金彩幣累改僉南京府後
 軍都督府事再被 命提督漕運鎮守淮安再蒞以
 來於勢要愈不假借惟冀退休未幾得解任回鄉行
 李蕭然篋書數卷丁未 詔復起用而已寢疾矣璽
 平生志意恬退學問該洽議論識見出人意外嚴
 毅而內沉靜人不敢干以私少侍父疾極盡勞瘁遭
 喪哀毀幾至滅性弟早喪撫其遺孤愛踰已子宮雖

廉時捐俸以贖親黨至於暮夜却舊屬之金十年還
亾友之寄其立德亦以盛矣

邵清

邵清字士廉國初自嘉興徙居江寧清幼有至性母
卒時纔三歲置於別室清號泣欲往視聞者異之長
端潔好學工古文詞弘治壬子舉於鄉授江西德化
教諭教諸生必以孝弟節義為言束修問饋之儀無
敢及門者乙卯秋山東巡按聘典試事志在甄拔才
俊高下或自主斷巡按者素重清名不易也事竣即
就道有謁贄者拒不受藩臬交章薦之選授監察御

史教職擢臺臣自清始也委督抽分其豪猾射利隱
沒者皆置於法正德初 皇親張延齡恃恩奏人負
券若干緡有 旨與追清曰御史朝廷耳目之官可
為人索私債耶其持正不避權要若此奉 勅理鹽
法兼管河道俱有勞績逆瑾始擅政索清賄不入矯
旨遣官校捕至榜數十罷歸家居閉門灌畦圃瑾怒
猶未釋仍罰米三百石交親為代償乃得足瑾伏誅
廷臣追訟其冤嘉靖壬午復御史陞雲南按察僉事
已丑改廣西左江兵備所居皆膏脂不以一毫自潤
行橐蕭然辛卯齋進表文事竣曰可以已矣乞休疏



兩上得允乃杜門謝賓客宗伯霍韜雅重清以所毀
潘祠田餽清清不受及疾作語其子曰爲已謹獨甚
難又曰競競業業過此生務要保全無過至瞑目心
始落耳數日而卒

李重

李重字元任別號邦江其先揚州江都人國初從戎
隸南京金吾後衛籍因家焉母太安人夜夢五色豸
覺而生重生五歲旦出嬉戲聞學舍子弟所誦論語
孝經中語夕歸盡成誦稍長卽刻勵爲學以應天學
生領弘治壬子鄉薦至正德辛未舉進士拜官戶部

主事時大司徒爲九峯孫公擬試天下郡縣存積糧
儲䟽獨謂其敷陳精覈鑿鑿可行雅敬重焉河南山
東流賊猖獗朝廷命將出師分理軍餉有功賊平
有錦綺銀牌之賜明年奉璽書督賦兩浙端本振法
風采自持澄挾弊源人不敢易時鎮守劉璟所侵官
銀至二十萬計密欲重有所遺以緘口曰與其遺我
孰若爲民償所負以足國璟知不可犯盡以所侵輸
官自是人皆曰鎮守且不敢爾何況我曹故兩浙宿
負徵完百二十餘萬前後所未有事竣轉本司員外
郎進郎中旋擢守德安德安部民會有告藩郡校豪

橫不法者直其民悉寘如法不少貸以是坐構者深
左謫河南布政司經歷量移南陽府同知用大臣薦
復起家工部郎中巡視河道陞守九江至九江未兩
月陞江西按察司副使持憲愈厲性故落落以阿順
上官風旨爲耻坐與上官不協竟以老擬致仕云重
在官二十年未嘗律已以恕亦未嘗假人以法非其
義者雖千金之貲不以爲子孫累義之所當爲者雖
匹夫匹婦之寃毅然以身任之也王公貴人有所不
避去德安日士民哭送出境迎其主生祀於名宦祠
中久而民猶有感泣者以南陽同知攝郡事爲民興

除不異真守民以李青天稱之焦員外希程者所爲
作青天公傳也平生所辨寃獄在在有聞南康立廟
廬山歲時祀以報之至今存焉經歷署睢州時中丞
王公蓋特疏薦爲異材丁亥元日風霾之變大學士
楊公一清奏言宜錄用守正被謫之臣吏部首以重
名請及歸老之後中丞易公瓚猶以田野遺德言之
朝雖未竟其用而聲望日以著矣歸老而貧如昔至
授徒高淳溧陽之間以自給尚書霍公韜欲以所毀
淫祠爲脩葺草舍之資辭欲贈以廢寺田又辭易簣
之時尚奉先人遺訓拳拳以不爲不義戒其子享年

蓋八十二云

史學

史學溧陽人弘治丁未進士辛亥授戶部主事差興外廩芻牧尋同中官及臺諫勘侵地于南城監漕通州檢甸服田灾督儲淮陰一歲當代淮人伏闕借畱從之歷員外郎中奉勅摠餉遼東時邊庾多虛悉心計度察近裡餘積弛刑徒用轉搬法漸以實邊又奏出帑金三萬多買粟豆積塞下爲備未幾虜大入軍賦有餘將士鼓奮虜不得志而遁正德庚午陞山東左叅政時盜起雄霸跳跟于河朔山東承平日久

莫敢攖其鋒學視河金卿群盜猝至因與僉事杜丙謀曰縣城卑圯不足恃以守徒死無益乃退保濟寧調銳士七百餘人指授方略出與賊遇多所擒斬賊退論者謂棄金卿而保濟寧涉于巽避竟落職歸旣歸建始祖廟葺先世祠堂割常稔之田以供祭脩賑凡八年忽召其二子謂曰吾數將盡函山乾原吾將營樂丘焉夏四月與客飲散登樓閱書忽疾作遂不起所著有埭溪集金淵節孝錄溧陽人物記藏于家

張諫

張諫字孟弼句容人進士授行人選福建道御史剛

正不阿屢侵權勢丁父艱廬于墓側產芝數莖後累
陞順天府尹剛果有爲百務振舉因忤當道出謫萊
州府進太僕卿卒于官

湯鼐

湯鼐字用之句容縣人由進士初授行人選擢御史
與庶吉士鄒智寺並負氣節遇事敢言弘治中上勸
學襄治二疏伏闕七日冀用其言 上亦多見采納
後疏劾閣臣萬安寺柔奸誤國爲所中傷下詔獄謫
戍甘州凡十年蒙 恩放還杜門掃迹自號鉄翁有
詩文奏疏若干卷以上壽終至今士林瞻仰之

張鰲

張鰲自莆田徙居金陵籍江寧縣以鄉舉出知合州
至則罷淫祠止邪教以正學倡督諸生嘗督木涪水
遇播酋倡亂爲所執坦胸露刃脅以必從鰲神色不
渝徐以大義拆之酋不敢害兒之還未幾酋陷綦江
上命督府糾兵二十萬八路合勦時以庚癸爲虞
廉鰲才疏晉保寧郡丞專司轉餉鰲奏記謂宜從舟
運又郡邑夫役宜分信地迺爲轉輸有譁而逃者以
軍法從事督府然之一切以便宜委鰲鰲乘小艇導
諸餉舸出沒數百丈驚濤駭浪中使萬夫牽拽而上

舟不可通則芒屨徒步冒雨衝泥以身先之士卒無
敢後者嘗上督府書謂鰲受事以來一身輕如秋葉
生死等于浮雲躬自拮据卽夢寐常自震驚云卒之
馬騰士飽折馘執俘蠻烟廓清異服從化而鰲之精
已銷亡矣當事者猶以善後屬鰲疏晉播州守時郡
治初勑百務叢紛日與裸身烏語之人更化維風部
署甫有規緒而病作不能支竟卒于官迨後 朝廷
行平播之賞追論鰲以捐軀勤王盡瘁事國贈兵部
郎中祀于蜀仍行撫按旌卹其家鰲生平篤于孝友
凡歷官祿入織毫與兄盤共之無少留于私橐盤亦
甚愛其弟兩人者皆忠實篤行君子也

徐珪

徐珪信之其字也上元人十歲能屬文倪文僖公一
見奇之謂其叔祖助教公曰徐氏有子矣弘治庚戌
登進士觀政戶部嘗攝監收倉粟能革諸弊給賞遼
東官軍被檄輿疾不以勸辭授知華容縣屬歲歉寬
禁緩責勞徠賑卹全活甚衆縣有黃洋渡雨潦時至
冒其旁田溢爲巨浸乃發卒築隄延數百丈仍歲大
熟民相與名曰徐公堤云均編役置平糴倉治狀稱
最入爲南京戶部主事改工部分司儀真丁母憂服

除補南京刑部陞員外郎郎中治職勤敏奮斷有爲
操憲任法卽里中舊故請謁亦毫不少徇蓋毅然強
明自信者也擢貳浙藩未幾告罷竟以疾卒遠近歎
息咨閔焉年七十有五

張琮

張琮字廷獻號惕菴其先吳縣人洪武初徙間右占
應天江寧籍琮自兒時凝重寡言笑未冠爲諸生不
狎於衆人亦憚之而文日有名成化丙午舉應天鄉
貢弘治庚戌登進士癸丑授工部都水主事管理清
江提舉漕艘事告者曰一自防百足理也笑曰自防

者分也無所理事何以集成漕艘之法古莫善於劉
晏吾且法之踰年數千艘成改禮部儀制主事壬戌
進郎中癸亥冬 孝皇不豫免長至賀 東宮親王
如故事琮請於尚書曰未有 天子不豫而王受賀
者 命下如所議占城國王請封制冊封夷王給事
中一人往占城遠在海外人憚於往六科倡議止之
疏不絕上尚書不能決琮曰封而不告與告而不封
天王之命討去矣禮先告哀而後請封國無訃命將
誰與以是詰之威信其庶幾乎卒從其言 武皇卽
位大喪大慶大婚耕藉幸學諸禮悉如制而小變之

皆著爲令晉藩有奪王封者時逆瑾受賄勢凌有司莫不傾靡琮獨執不可瑾曰一郎中力能勝尚書耶出爲陝西叅議奪者卽如所請京中語云鐵漢去矣如禮何丁母憂歸正德庚午服闋左遷濟寧知州州苦於要衝日費錢數萬裁省十之八所過卽權力者歛跡而去尋改山東道監察御史巡按甘肅時方討安化之叛餘亂未息琮至恤無辜治有罪安輯邊岷遠逐夷虜獎誘忠勇舉用賢淑懸賞耀威而腹心效順矣一日視虜刃曰吾南方一刃千牛而不改鋤此何藉以刺人耶擲之地下虜吐舌大驚呼太師爭獻

牛羊酪爲壽曰太師其神乎疆圉乃靖辛未瑾誅擢湖廣按察副使備兵鄖襄當河內陝右三路之衝流民盤據爲城社琮緩順攘逆示以大信行以大法有稱浮屠教聚衆數千人僞爲符璽僭自稱王大亂將作郡邑動騷諸監司議請兵討之琮曰此特縛其首足耳陰命勇士數人入其巢獲之且諭衆曰此謀非汝等所知法不及汝衆駭散遂定乙亥擢貴州按察使兼布政都司事邊岷夷落戎衛諸種規模一新上以勞勩有金幣之賜丙子擢四川右布政使戊寅轉左布政使時舉松藩兵取宮殿木軍餉夫役之勞

費甚多郡縣告困而內豎劉允往西竺迎佛所過閭閻殘廢聲絕雞犬乃命輸以近儲挽以津人迎以僧徒省煩裁冗沮遏其勢事就而民免於俘屬人曰不圖今日復見張益州也松潘平朝廷再下金幣之賜已卯奔父喪歸辛巳服闋補廣西左布政使明年嘉靖改元拜都察院右副都御史以節鉞鎮湖湘十有八郡兼贊理諸軍事時黃鏐造逆劉召為亂丁爵萬明福倡妖於德安李全伯作孽於襄陽阿核構逆於芒部荆襄大饑運艘告乏凡七下簡書酬應不暇琮調遣諸兵召令郡吏相期難易緩急授以方略次第

舉之不踰年而悉平所賑饑民用青州法因時小變民免於死亾甲申進南京工部右侍郎候代境上乙酉改南京刑部琮雖家南京素無狎比者門無私謁雖葭莩之親有犯不敢私庇之丙戌進南京都察院右都御史言於諸臺曰朝廷之法執於御史執者廢法將安歸惟寡交遊則無私謁少宴會則無請托皆惴惴而退鮮不憚者遇考劾首黜不法者數人六卿皆不敢以屬吏自比琮轉官自刑部以至都御史皆居公署諸子在私第非召不敢至門可雀羅已丑乞休疏凡四上始得請命有司歲供夫役月給廩以優



其老庚寅以疾卒於里第年六十有八訃聞賜葬祭
有加琮筮仕四十餘年惟故廬數楹至貳卿始易居
亦不崇廣致政後始置田頃餘不能歲給焉

顧璘

顧璘字華玉上元人弘治丙辰進士初蒞廣平知縣
甫弱冠耳而剖決敏利摘伏嚴明正德庚午出知開
封盜起燕薊流劫中原彭澤領兵壓境上簡璘自輔
璘練兵轉餉折衝戡亂謀畫居多鎮守中人廖堂恃
逆瑾黨自恣璘每折其萌芽瑾誅廖罷去而王宏者
尤諂謾繼廖出鎮璘不爲禮有所徵需亦不答用是

積忤宏方恃錢寧爲援矯

詔逮赴錦衣獄遣邏卒

陰探郡中無所得乃文致他比以上鐫三階徙全州
知州全僻荒遠陋拊教之久民用乂安士興於學甫
三年移知台州台武衛錯居俗獷而喜訐胥吏並緣
爲姦璘得其利弊所在次第興除之故事武衛諸城
郡爲修築費率爲重者乾沒恒歲一築築輒壞璘鈎
得所侵漁悉沒入爲城費擇人經理故所隸三城特
完郡瀕海貧民業鹽自食苦邏卒窘之相賊殺不止
乃爲弛禁俾得負販出郡下而薄其稅往軍餉不時
給貧軍多稱貸駟僮肆爲侵牟璘支放有期軍餉以

足而姦民不得恣其巧既久於台盡悉浙中事宜繼
叅藩浙省及轉左轄日益練達展采錯事惟志所欲
爲縱文牒糾紛隨事剴裁司無留政御史按浙者皆
歛手無所事事迨巡撫湖廣輶車徧歷州郡跋涉險
阻不爲厭故事行部以藩臬守臣自隨悉以謝去供
頓次舍才足給用務汰奢費民不知勞所至勸農業
平徭稅民用安集而歲亦比登在鎮逾年多所建白
時雖不盡行而所言皆出篤論已亥陞刑部右侍郎
會 顯陵肇工改工部尚書領山陵事 顯陵之作
經費不貲璘長於料簡程省弗懈視他所營率損費

十五而規制宏敞功實倍之事竣改南刑部尚書剛
正自持不肯翫法徇人高視濶步遇權貴傲然不爲
意而與山林文學行誼士乃講均敵禮獎進之唯恐
不給坐是忌者側目雖晚躋大位卒困於讒以沒惜
哉平居事親孝父病疽年已五十餘與同臥起吮濯
扶掖曾不委勞於人少學于李璠李死妻萬不免饑
寒分俸資給又爲其子置產子卒乃迎萬養於家死
爲歛葬而厚給其孫友人胡欽死妻方食貧養姑俾
里中上其事請表於朝爲文雄深爾雅詩尤雋永時
出奇峭樂府歌辭不失漢魏風格所歷沅湘天台衡

岳皆山水勝處雖簿書鞅掌而感時懷古臨觀賦詩
風流文雅照映林壑有古高賢特達之風所著有國
寶新編顧氏七記詩文有浮湘稿山中集息園集憑
几集登衡小記總若干卷並行於時

金達

金達字達卿號望山江寧人也父澤累官右都御史
達幼承家學奮志下帷舉弘治乙卯鄉試連登丙辰
進士除陽信知縣明以燭偽敏以集事上下翕然稱
賢前令負官物妻子久繫幾瘦死達代償之復厚贈
遣以歸藩王之國道出陽信達請無斂民財聽取貯

帑官錢給之又憚民遠役不便令母行但以顧役錢
往故雖重事邑不知擾三載以治最內徵擢太僕寺
丞丁母憂服除改禮部主事進員外郎陞廣東按察
司僉事大帽山賊累年為患率兵往征士卒用命遂
擒渠魁林貴等斬首千八百餘級上嘉之有金帛
之賞正德辛未解官歸時都憲公家居無恙日奉左
右極其孝敬及卒情禮咸備友其弟尤極眷愛卒於
正德己卯年五十有八為人魁梧倣儻饒於才智周
乏拯厄日不暇給至人有過亦面折不諱大家世宦
賓客雜沓終日應報情禮有加畧無倦色卒之日咸

痛惜之

梁材

梁材字大用南京金吾右衛籍弘治己未登進士授
 德清令尅苦勤敏一日勘事他邑重囚越獄而去材
 還禱於城隍未幾就擒詰之曰汝既遁何復爲我擒
 賊曰有一緋衣人尾之欲脫不能耳人咸以爲異正
 德二年晉刑部廣東司主事四年署貴州司員外郎
 獄小大無遁情大司寇洪鍾每命諸司錄其讞案以
 爲法五年改山東道御史逆瑾誅梟諭天下出其手
 筆大學士李東陽見而愛之及爲史記李與次相楊

廷和各製一篇俱不愜意會司寇何鑑中丞楊綸令
 其屬徧爲之李見材作喜曰此以古詞兼律筆足示
 後世矣遂錄付史館六年出知嘉興未幾調杭州杭
 以繁富名材愈以清約自勵十一年進右叅政尋進
 按察使會宸濠變起濠去浙邇倚鎮守中人畢真爲
 內應人心洶洶御史張縉謀於材曰事急矣將若何
 材卽就案草檄調兵方略布置一日悉具又自往說
 真令撤兵衛自是姦謀內沮浙恃以安嘉靖二年服
 闋補雲南按察使先是有土酋相讐殺者六載未定
 材召至諭以王法當誅今姑貸汝死如例罰牛羊以



贖土酋頓頽輸服三年晉貴州左布政使尋調廣東
凡入民課金令輸者自權之而親爲監督主藏者不
得高下其手往來傳置諸所餽遺卽菓蔬弗受也六
年進右副都御史巡撫江西未兩月召爲刑部左侍
郎七年改戶部兼右僉都御史總督雲貴川廣糧餉
冬晉尚書十年丁內艱十三年 召復任 駕謁山
陵受 勅居守者三十七年以考滿解職明年廷臣
上議僉欲用爲司徒乃以原官加太子少保時永嘉
張璉新貴用事常以意氣挫折公卿一日於朝堂厲
聲語云梁大用某處糧草當辦則應曰諾某處折銀
當發復應曰諾永嘉意其黥弗了也旣而偵之則無
弗夙具者張乃歎服 上念吏治龐雜特命材以司
徒行考察汰簡數百人人心大服又大獄久不決者
四事 上命兼司寇讞勘之居數日盡得其情擬奏
上喜曰得尚書十二人如材者 朕可無憂矣事竣
乃還印刑部皆以 特旨從事前此未有也時翊國
公郭勛恃寵專擅損兵冒餉疏劾之 上下其章所
司讐勛威莫敢詰復按勛不法十事草成未上爲僚
友泄其語反爲所中遂落職歸兩月而卒初嘉靖中
工作大興邊費無藝材殫竭心力不稍加賦於民

世廟以祠禱故於額外有所需材執曰終不以無益
 虧國計 世廟心弗善也頃之材去且死卒至邊儲
 大窘計無所出 世廟乃歎曰令梁材在當不至是
 居恒約勅僚屬壹意奉公狷潔正直出於天性佐食
 以園蔬絕無兼味為尚書宅憂歸始有居宅及召還
 司徒塗人丐子相語云天眼開召回梁公矣卒之日
 家無餘貲子孫至不能之京斬卹典隆慶初奉遺詔
 補給祭葬贈太子太保謚端肅

李熙

李熙字師文上元人父昊浙江布政司叅議熙登弘
 治丙辰進士授將樂令擢監察御史正德初太監劉
 瑾等濁亂國紀抗章請誅犯衆怒矯詔繫錦衣獄廷
 朴三十罷歸髀肉盡銷不死瑾猶啣之踰年復擿舊
 牘得熙名文致微過詔於南京廷朴五十囊昇而出
 人謂死矣已而膚附骨生竟不死瑾伏誅廢者率起
 熙獨以擊刺貴要抑不得用家居一十六年嘉靖初
 起守饒州府遷浙江按察副使方按部定海得疾暴
 卒享年六十熙清夷簡重才行修美孝於親友於兄
 弟交友以胸臆初仕為將樂令再起守饒意所注錯
 準古條格去官之日玩無奇石噐無精美為御史居



桑梓之間執憲行法親戚無敢請謁居家時杜門息
交雖公卿存訪僅一往謝而已居飲虹橋側時輩稱
曰飲虹先生亦况其負氣而善藏也喜賦詩所存有
尚友集明農稿若干卷

黃宏

黃宏字德裕號友蘭六合縣人幼有至性律已甚廉
以弘治進士起家爲萬安知縣撥煩調泰和徵入爲
戶部主事乞便養改南京刑部主事戶部員外郎禮
部郎中出爲江西布政司左叅議會徭賊作亂上
命都御史王公守仁統兵征之王公檄宏監軍督餉

紀功捷聞詔加俸一級賊閔十四等旣降復恃逆濠
勢剽掠九江上下莫敢誰何宏毅然發兵捕之獲其
輜重以歸逆濠久蓄異志士夫相對常以爲憂宏獨
正色曰國家不幸有此我輩守土之官唯有死而已
正德已卯濠將反以誕日宴諸司官伏甲宮中次日
入謝殺孫巡撫燧許副使達械宏入獄忿恚不食而
死濠誅詔祀於南贛者曰三公祠祀於省城者曰旌
忠祠朝廷追死事諸臣贈宏太常少卿焉

朱衣


朱衣字正伯先世山東之茌平人國初徙金陵後以

戎伍隸錦衣籍衣幼敏慧異羣兒十四補諸生每試冠其曹已受廩弱冠多從之受易者嘉靖甲子舉於鄉母病痿篤丙夜禮斗乞以身代有白光降几榻之異疾遂愈三上春官不第念母老且病懼不及其身祿養辛未謁選爲臨淄令邑多逋賦舊多侵於里甲置櫃許自投踴躍樂輸無後者有大俠越境結客睚眦殺人乃置爲首者于法餘未減迎兩尊人於宦邸未幾相繼以歿貧不能歸其喪兩臺及郡守各賻贈始克還里服闋補鄖西令撫臺王公特疏調房縣房巖邑邑令多被告訐署篆者遞更易訟牘填委比至

斥訟師鋤強猾期月完積案七百有奇民乃懾服無刁訟者值旱步禱禱畢而雨歲以有秋官堰爲有力者據壅水專利水漲田稼漂沒乃鑿石以當堰旁濬池瀦水以殺其勢下築石堤爲斗門建閘啓閉又分爲蘆管七百餘以達遠田歲可灌千餘頃邑人因名曰朱公堤立祠肖像王公爲文勒於石始邑倉無擔石儲至是積穀至五千餘石修黌宮葺縣署創尹吉甫黃香祠皆取諸鍰金民不知費有裴簿者卒於官不能歛爲治其喪而歸之至私橐窶如也居房五年七薦稍遷沅州守父老赴撫臺本菴楊公留之會邑

有鑛徒哨聚數百人被劫殺者數十楊公檄衣率民
 兵治之馳往下令曰持鐵者賊空拳者民不得妄戮
 乃戮倡亂者餘黨解散因伐木雜土石塞崩洞以杜
 亂萌邑城故無濠乃鑿池深廣丈餘堤植果木不四
 月告竣楊公獎慰甚在事者忌之及抵沅會守兵脫
 巾鼓譟報一日十至衣曰非反也迫於饑耳白治兵
 章公先遣牌撫之期以翼日予餉牌下且疑且信而
 餉隨至眾皆偃旗受餉既定禽其首領四人寘於法
 蒞沅四月竟為舊鄖守所中銓部議調而竟飄然歸
 矣既歸故田廬悉推與其弟環堵蕭然歲儉至與童

僕啜糜粥無愠色日惟手蒔花卉焚香啜茗玩法書
 繪事以自娛親友過從則為漉酒摘蔬盡懽而後去
 與談時事及世俗鄙瑣搖手不應四方知交宦金陵
 見訪一報刺外屏不見蓋是時子之蕃已為諸生有
 聲矣為授徒資修脯以佐其貧甲午始中鄉試明年
 及第第一其秋迎養京邸偕同志遊郊園一再遊西
 山登覽矯健不減壯齡十月幾望遊天壇歸疾作忽
 中夜召修撰君曰頃夢石城許公言待我久當同往
 南方極樂地修撰君訝之則正色斥曰而祖年六十
 五我年適當之數定矣進湯藥揮去問所欲言曰我



無所慮復何言遂逝

李登

李登字士龍別號如真上元人弱冠補弟子員為學使者翠巖黃公初泉吳公所賞識嘉靖辛酉天臺耿公督學南都以理學倡時從游者多名士未嘗不以登為祭酒隆慶間詔郡邑拔士雋充胄監天臺公竟以登應卒業南雍大司成對山林公與結忘年交屢試弗售謁選授新野令至則端士風明學術嚴考課捐貲以給薪膏適歲不稔設糜粥以待民之無告者徐乃廣置義倉取鍰穀實之邑有八水築土堤以

捍其遄激橋名通仙增修之以復其勝期年而謳聲遍洽屬邑有黥宦魚肉邑人登列狀上聞宦修郤用蜚語中之改諭崇仁為訂居業會熟仁會所與終日語者諸生退而錄之成帙居二年餘浩然有歸志曰久矣白門有約吾不欲久虛也歸集舊游聯新知隨地約社隨人應機性至孝父竹塢公年不四十歷三娶委曲事之動能得其歡心為諸生時嘗憤里中戶役重困一夕竟不寢篝燈屬稿翼日上書當事者時垣中公大為感激旋藉所上語入題疏中隨得題免坊民以是沾百世之利蚤歲冥契內典比謝仕閱藏



東山摘所賞會別加錄記有般若約抄若干卷宗鏡錄抄若干卷覺海同符若干卷生平究心性命外百家羣籍亦多兼通如字學聲音點畫反切清濁辨之細入毫茫篆隸草楷諸體各極精工故遠邇問字徵書履綦滿戶一切抑心應之著字學正譌六卷正字千文二卷讐刻篇海五卷撫古遺文一卷所撰詩賦諸文無意工斷居然先進風有冶城真寓存稿八冊續稿二十一卷老子約筌二卷俱行於世最晚著易知齋家藏一卷貯於笥室如原子而車轍日至年近伏生而韋編不輟歲已酉病脾食漸減骨立謂兩孫曰人不當以知見用事要平日於本性上用功夫若依傍非真焉保臨終不亂乎小子識之尋瞑目而逝

顧瓌

顧瓌字英玉號橫涇先世吳縣人隸籍應天正德甲戌進士授南京工部主事武宗南幸欲擇一通敏有識者侍左右備倉卒顧問衆以推瓌一日上注目久之曰女管船官耶瓌頓首上謂侍臣曰甚爽例可著充護衛官遂護蹕還京時東橋公與掌銓者有舊欲與之偕謁不往其父亦諭之不宜太峻終不往庚辰陞南京武選郎奉旨查冗員魏國公子徐

某亦在例中頗脩名譽爲之請者甚衆白巖喬公亦欲庇之堅不可自是當路者滋不悅明年謫知許州部民某不事生作屢與族人構訟按致其罪於法願贖金璫曰汝安從得金民泣曰丐於親故耳徐譬之曰汝旣構女族又累女親於心何如民叩首服罪璫察其有悔悟意曰今赦女女當改行仍以俸資三兩給之其人遂化爲良民邑中人聞之咸謹呼嘆頌訟牒爲希人復有嘖言於喬公者喬曰顧英玉佳士以少年錚錚姑抑之耳言者慚而退陞溫州貳隨晉山東僉事備兵沂州沂多盜以保甲法寧謐一方轉河南副使整飭信陽等處汝南有巨猾交勢要而陰把有司者廉其狀捕寘於法與部使者論事有不可輒封還移文同官駭愕璫曰朝廷置按察爲外臺枉法媚人吾不爲也信陽舊有田租若干皆歸備兵者私橐習以爲常歎曰爲官自有常祿此何名也盡貯之公解適前兵備爲按察使陰賺之遂媒於部使者罷歸歸而貧甚授徒自給以終其身璫卽璘親弟

顧國輔

顧國輔字維德號毅菴先世崑山大父少孤育於張從徙金陵遂蒙其姓至萬曆癸巳始復姓顧氏國輔

少下帷勤苦有聲諸生以隆慶庚午舉於鄉萬曆甲戌成進士授刑部主事時江陵柄國治尚操切秋慮囚屬有所縱舍牘上江陵意弗驛問尚書囚臯狀國輔往對具言囚所以不當入反覆甚辯江陵不能難尚書器其材一切論讞咸咨之爲郎六年以父憂歸起補原秩出爲襄陽知府時值旱疫死者以谷量至則首議賑卹饑者予食疫者予藥流民就食者設糜舖之所全活者衆明於法比判決如流下教務與民休息胥吏之莠政莠民者輒抵罪一郡震洗躬自菲澹爲墨綬先終任苞苴無敢至門者往奸民以襄府

爲逋逃藪有司莫敢誰何王雅重其治行數戒舍人兒母骹法奸民由是衰息戍卒譟郟陽羣毆監司襄人洵洵虞有脫巾應者召諸將士諭以大義帖然亾譁已奉 詔逮首惡泣殺於襄郡中復洵洵爭傳逆黨且下甲劫囚去令邏者遠偵之趣加刃卒以無事在郡五年擢浙江副使備兵寧紹閩帥某耄而貪汰戈船卒十之三四取其貲以媚諸貴人至國輔屹然不爲動帥乃戢故帥楊文驍將也以事坐廢數言於制府稱其才可備緩急後帥師征西夏論先登首功御史臺刺郡邑吏短長急列賢者以聞而於微曖註

誤事涉帷簿者削不列生平好道人之善而掩其過類如此壬辰楚使者中以考功法聞報亟解任歸兩浙縉紳人人扼腕爲治橐中裝以行悉謝不受董太史追送之江曰吾不悉使君治襄悉使君治越也廉明若使君者而乃絳吏議哉爲感慨泣下而別後太宰御史大夫尋知謗由襄司理蓋司理以侯家子所爲多不法嘗卽其左右微檢之遂大望乘間造言蠱當事者後使者知其奸論劾下之獄於是其誣乃大白家食二年以復姓詣奏都下部調寶慶知府趨起不欲行會同里焦太史竝勸駕而往至則屬歲大饑

多方賑卹一切政事悉以襄之治治之積勞病發會使者按郡手削官賢否獄訟錢穀諸牘以上及使者條覆諸事不移時而畢歎曰吾行過諸郡其治辦獄無枉獨是郡耳而竟病徂不支以萬曆甲午卒於官得年五十有七爲人真率夷坦是非信其衷母面謾人或初受其德已而背之終不以人有負而故倦施伯父老而貧爲捐貲置產令歲收入自給如是者二十餘年張氏子婁亾其貲時時周給不厭食無兼味衣無重采室無姬媵於聲色玩好泊如也子起元戊戌會試第一人廷對賜及第三人今官南吏部侍郎

國輔以起元貴 覃恩贈少宰次子起鳳成庚戌進士今官嘉興府知府季子起貞領辛酉鄉薦

鄭宣化

鄭宣化字行義號獅南先世温州樂清以武功授龍江左衛百戶貫籍金陵嘉靖乙丑進士授袁州府推官材猷通敏其鞠獄若手權而游移於一衡之上不爽鎚銖剔蠹平枉機宜咸中大者如訊南贛三巢之俘馘平豐清二邑之疆界汰豐城數千石之浮糧卓卓在人口碑遷南工部主事分司蕪江嚴立權法掃除其實穴根節使大猾無所容權入委於縣籍記循

環覺察秋毫不以自淄調兵部郎中往軍衛船役以年限貧富苦不均題奏割羨補贏具有條式又船馬銀羨餘或闌出騰物議特置籍鉅纖登載出納同僚佐押記互相稽察圭粟無漏缺屑越之處二事至今踵行之節丁內外艱服除補武選司郎中時江寧專柄與其黨王少宰要結勢傾一時少宰有甥先世以百戶冒襲千戶覈罷之一日江陵出片紙欲以錦衣某掌某事固陳不可江陵怒起前止之畢其詞去明日而邵武之命下矣及抵郡人相語曰是昔爲袁司理持法不撓者是爲南北兵曹不私親舊不畏疆禦

能忤張江陵王少宰者於是大修學宮指授諸生以經義月品第激勸之以為常先是邵光泰建四邑糧歲輸郡庾給軍餉後以泰建山險轉輸艱有司盡徵折色行之久而弊滋軍士所得於公與其市於私者兩不相值兵民交病而倉廩亦虛為言於上復邵光二邑之稅給軍士食士皆踊躍呼曰太守活我勞中丞出鎮閩籍中朝勢齟齬人俄怒建寧令輒謬以贓罪劾之具言其令材而賢爭之甚力後中丞趙下教郡中行保甲練兵士講求銷變弭亂之策上書止之因作樵川圖說謂樵川所屬四邑惟建寧悍驚剽

疾易動難安儻得強幹粹白之吏可幾而理若邵武民情稍淳無甚大梗可易治而光澤有杉關之險泰寧憑四塞之固亦易守凡吾所為興學育材富民足兵者皆銷變弭亂之本非如今所謂修保甲練兵士徒為具文也者在郡甫二禩甲申正月與寮友飲於郊疾作暴卒縉紳士若民若兵衛驚駭嗟悼走吊哭襯還哭送不絕聲相與立祠範銅俎豆之邑博士弟子具其功行請祀於學宮為人事父母孝庶弟三人鞠育教誨之不遺餘力言貌溫溫樂易而大節所繫則毫髮不以假人利害禍福臨之不為變居官俸入

本朝分省人物考 卷一 二 四一
之外一無所取卒之日官舍空然臺史監司佐其貲
然後得以觀歸

吳自新

吳自新字伯恒號韞菴應天府人進士授工部主事
歷員外郎中督工大內程材量役貂璫亡所乾沒出
守杭州俗故侈汰以廉約鎮之織府金累萬他主者
類蟻穴其中密爲勾檢歲省數千杭人德之肖象祠
焉稍遷兵備副使進右叅政又遷按察司歷左右布
政皆官于浙在浙勞心疆事訓伍輯民而歷年旣久
凡民間風尚賢不肖主名吏治臧否不可欺以織髮

故十數年之內七十五邑宴然靜于安瀾擢都御史
巡撫河南治當南北孔道諸務旁午細者理解大者
霆擊事集而民安焉晉南京刑部右侍郎方與諸司
約謹官箴慎交與簡聽訟而一疾遂不起矣計聞
詔賜諭祭自新負經濟才然實本之道術爲多嘗自
爲贊曰入道德之門不談道德處功名之地不競功
名博詩文之趣不習詩文探仙佛之源不宗仙佛世
方赫赫我獨冥冥世方矯矯我獨平平人以爲數語
酷肖其生平云

南直隸應天府
 姚隆
 何鉞
 景暘
 何遵
 黃琮
 陳沂
 王暉
 王以旂
 尹鳳
 伊伯熊
 金賢
 李春芳
 樊鵬
 楊成
 殷邁
 王韋

人物考卷之十三目錄

南直隸應天府 三

姚隆

何鉞

景暘

何遵

黃琮

陳沂

王暉

王以旂

尹鳳

伊伯熊

金賢

李春芳

樊鵬

楊成

殷邁

王韋

許穀

羅輅

張後甲

焦瑞

焦竑

王春顯

謝璿

劉小閔

徐霖

李以疑

景

何

景

何

本朝京省人物考卷之十三

南直隸應天府

姚隆

姚隆字原學國初籍留守衛家金陵登弘治壬戌進士初令浙之新昌時歲旱民多流殍設法賑濟多所全活數辨冤獄有懷百金謝者力拒之陞禮部主事轉郎中出守荊州府威惠並行明年大水人負高阜大樹日夜嗷嗷隆命駕小舟千艘濟之仍各給以米活者數千人是冬大雪孳者塞途又命人搭蓆舍於江岸以庇遠來趨食者而於近境爲粥啖之活者不



本草分名卷之三十一
可勝計又明年脩築黃潭等處決堤曲盡規畫雖工
費數萬緡毫不取辦於民政績著歌謠載道忽以疾
告歸民皆攀轅號泣枳道不得前肖像祠祀之歸家
不入城府不與時事有田二頃僅給朝夕處之裕如
也

何鉞

何鉞字勲伯號東谿國初自姑蘇徙占江寧家焉鉞
自幼穎異不羣嘗見伯兄曆算卽能通曉大義父喜
欲令竟其習有李公者獨奇之而謂其父曰天文終
術家耳是兒豈可以術拘乎令治詩入郡庠累試高

等文譽蔚然正德辛未登第授行人奉使楚藩固辭
餽贈以廉介著聲擢浙江道御史直言無避武廟
欲以城中積慶鳴玉二坊爲演武習射之所鉞抗論
此必左右近習假弄威權侵奪民居以爲第宅園囿
疏不報而事亦中止丙子奉勅清理戎務事涉貴近
一切奉法惟謹剗剔奸蠹直搜根穴兩陳事宜力救
建言下獄御史張仕隆等得從寬減戊寅守父制服
除巡按兩浙至則清理冤滯摘發吏奸嚴禁和買鋤
治豪強彈擊貪污不職者數人藩臬郡邑罔不敬憚
而亦以是中時所忌明年擢荊州守賑饑恤災飭吏

申法如治家事遼府繁衍宗祿不繼比徵至多為有力者倍取乃以期均給不偏低昂眾咸悅服荆南分巡駐府事多諮而後行鉞與語數不合一日偶有所指遷怒於鉞竟拂衣而出曰吾豈能諂事上官以腰膝皮面易二千石祿米耶即解組歸當事者檄催旁午竟不赴以壽終於家

景 暘

景暘字伯時從真州徙居金陵噐宇弘雅凝然負公輔之望數歲時隨父官廣州劉大夏見其文異之曰此國噐也正德戊辰舉進士第二人授翰林編脩時

逆璫竄政凌轢朝紳見者靡不重足屏氣其不阿附者暘及何瑋崔銑呂柟數人已耳在館職以不獲禪補時政居恒深念作自罰一篇言蒞是職者必自責自砥勉於勤慎所以補過也詞甚諄至久之為講官當進講必越宿齋沐覲有所感悟九年遷國子司業以資當進侍讀梁儲曰成均為多士範非景暘不可暘亦曰朝廷官人敢自擇耶於是六館士人人以為得師二年請養願改南以左中允管南司業事時士方競便利請託紛至暘一切謝絕不行與諸生講解寒暑不輟辛巳以母憂去位甲申服除北上行至真



本草卷之八十一
三
州病卒賜少產於真州易簣之地卽其懸弧處也人
咸異之素篤於孝義母目盲萬方療之不愈旦夕禱
於神忽雙眸炯然舊疾如失人稱其孝感云居官清
約不異布衣每升監乘一牝羸蹇行旁觀者若不
能堪暘自若文以意勝耻事鈎棘詩蕭散有致嘗曰
詞貴其達若以摹擬爲工按古人之跡尺尺寸寸務
求肖似何以達吾意哉識者韙其言所著有前谿集
行於世

何 遵

何遵字孟循南京欽天監人以諫死嘉靖初贈尚寶

司卿廕子入太學祀於鄉賢又詔禮部爲祠專祀之
武皇帝朝瑾彬相繼用事彬導 上遊幸遍祀名山
將入江南而寧濠方謀以侍子入朝侍彬爲內應比
南巡 詔下彬幸得便窺伺懼中阻乃爲危言撼衆
兵部郎中黃鞏翰林修撰舒芬首以疏入諸曹稍稍
踵之 武皇帝震怒彬揚言鞏旦夕且死冀以脇衆
遵入疏力言淫祀無補敗亂萬一宗藩藉口奉迎潛
懷不軌則福未降而禍已萌蓋指濠也彬畏事泄匿
不以聞遵慮衆爲彬所脇又鞏罪叵測復與同官林
大輅蔣山卿上疏乞罷巡幸勿爲姦邪蠱惑鞏等無

罪願寬宥毋使後世有殺諫臣名不爾臣與同死彬
乃四出機穽下遵等於獄復嗾其黨劾之被 旨荷
校暴午門外五日杖五十罷遣彬自請視杖杖者復
視賄爲輕重故杖視他人爲甚體素羸又憤所言不
達瘡潰不可療越三日竟卒邸舍獨僮奴何安一人
當草䟽時前持哭曰主縱不自計獨不念老親幼子
邪遵執筆從容曰無多言歸見大人爲謝萬死兒子
令勿廢學足矣草章已書託鄉人太僕卿周金編修
陳沂後事語不少亂是時子世守方數歲遵年三十
四爾旣卒南巡議亦竟寢遵以正德甲戌第進士吏
部尚書陸完噐重之未幾當試臺諫獨引疾弗出曰
吾不可資人以進丙子拜工部營繕主事明年榷木
荆南故事多昵奸胥歲增羨以自潤遵一以廉率之
威惠並舉比去行李蕭然卒之日貧不能殮得鄉人
賻而後以襯歸葬先是被杖時父鐸與家人墓祭有
烏悲鳴而前心異之比抵舍聞工部有以言獲罪者
鐸長號曰遵其死矣已而果然

黃琮

黃琮字元質先樂安人成化間始附籍上元數年而
生琮穎秀絕出逸而多韻補應天府學生作平蠻金

陵二賦文譽騰起舉弘治乙丑進士與脩 孝宗實
 錄授青田令時逆瑾擅國秕政蔓作琮舉意高遠不
 規規與俗俯仰以入計不納賄於瑾謫長樂學諭劃
 然長嘯曰所不足於縣令者果子也夫教吾所樂也
 陞堂講授寒暑不倦瑾誅陞郟城令時寇滿山東城
 圯弗可備抵任二十日而塹成又三十四日而門闔
 完恃以無恐謂山東之困弊於馬著馬政二篇又作
 問官祠內祀孔子及郟子自爲記欲學者知孔子之
 聖由問學至也陞廣州守益練牧民之體俗有隱瘼
 咸得上達一一調御之得秦少遊海棠橋址拓置堂

字羣士子肄業其中以風夷俗拜岷府長史再疏乞
 養侍奉之暇灌園藝圃泊如也 世廟初復有崇府
 之命方擬就道旋以疾終所著有宗說楚征日錄青
 田稿郟城稿嶺南日課東歸稿藏於家

陳沂

陳沂字宗魯號石亭居士先世鄞人曰珪者國初以
 醫徵入太醫院遂家金陵父夢僧奉明珠入室旦生
 沂五歲能屬對八歲能摹古人畫十歲能詩十二歲
 能攻舉子業語率奇拔驚長宿總角著孔墨辨赤寶
 山賦傳誦人口自是行誼文學日益隆茂弘治辛酉



舉鄉試正德丁丑成進士雖久處韋衣時名燁然出
人上旣仕改翰林院庶吉士除編修與修武宗實
錄嘉靖癸未同禮部考官實錄成賜白金文綺充經
筵講官踰年出爲江西布政司叅議沂素抱經濟喜
於治民至江西則備設科條杜奸鋤梗百務釐舉進
山東左叅政按沂莒滕費諸郡邑察其灾荒發官帑
市牛給民墾藝寬其逋稅暮年歲稔又爲捐除種馬
薪木運部諸徭民獲甦息嘗至鉅野察有盜賊將發
議調卒捕襲之言於中丞初不謂然已而盜竟破城
以去始服其略嘗遇執政於德州勞之曰先生久外
行將召矣對曰齊民困甚苟行吾疏勝吾拜顯爵也
後以事忤太宰屢歲不遷久之改山西行太僕卿遂
再疏請老杜門著書絕意世務所著有皇明翰林
志金陵世紀花巖志名山錄又南京總志山東通志
皆出筆削居家孝友備至拯艱扶危不靳餘力鄉人
謂其清修厚德文藻惠政合而歸之曰有道仁人咸
以爲寶錄云

王暉

王暉字克明號克齋先太原人自宋南渡家句容暉
狀貌魁梧舞象時不類恒兒七歲授孝經小學卽動

引古人自期稍長讀書朗然貫徹家赤貧父恒朝夕
歎曰安得兒輩有代勞者乎曄竦然獨念諸弟稚無
可擔負者乃釋書冊代父什一以給暇則手一編不
置時時顧影嘆曰天生予而使之久居人下耶邑有
踐更役代父解藥材於京會校士南宮偶閱一孝廉
文笑曰吾力能辦此頃之榜出而孝廉得雋矣曄奮
曰吾異日不以此起家者有如日歸獨居一樓謝絕
一切每至午夜誦聲烺烺屬詞則自發其藻不繇師
指而每試輒冠正德丙子鄉薦明年登進士授吉安
推官時宸濠反逆曄提兵助王守仁以擒叛嘗令一

吏督戰艦及期無一艘至以軍興法立斬以徇一軍
股栗嗣是與叅密謀兵攻南昌城破贛共擒逆濠斬
殺擒獲無算捷奏有首從義師爭赴國難協謀并力
共收全功語時舉告廟飲至禮而會母憂卽苴杖
就途不反顧後朝議誥新建功自伍文定而下特稽
故以難之服闋僅加二級補大理寺左寺副大禮議
起隨楊廷和等伏闕泣爭觸上怒杖於廷尋遷江
西按察僉事分巡湖東曄精於法比時時以情衷三
尺而行廬陵有父子三人晝剽人而奪之金者邑令
周俱置大辟曰此爲饑所驅耳而闔門坐死可乎令

曰此直指意曰法如是而止卒釋其二陝商以販錦至臨江忤貴家值地方捕盜貴家嗾邏者并逮之不勝榜掠遂誣服經十餘年未決暉移文覈其年月并召居亭者得其實立釋之自是名大噪於西章矣攝學政校文以理爲主浮誕者黜故一時獎拔者多知名士尋陞光祿寺少卿已從太常卿陞右都御史巡撫江西江西故舊游地民瘼吏弊洞析其委至則立綱振紀懲貪植廉一時黃綬而下有望風解印綬者已陞戶部右侍郎總督漕運兼巡撫鳳陽等處至則夙敝盡掃歲綱如期無後者其貫海州之馬課裁揚

州之二閘人尤便之晉陞戶部尚書總督倉場等務搜伏匿革冗濫吏不得侵牟爲奸有戚畹以玉帶黃金餽爲請莊田地峻却之往倉場曬穀率雜泥沙乃甃以磚石巽爲永利上屢賜紵絲獅補等又賜獻皇帝御書文行忠信四篆字以示旌異亡何以兩淮解銀未及覈先尚書王杲被罪去科臣厲汝進語侵暉上乃賜玦以歸卽日單騎趨里日灌園城南與二三昆弟暨微時知交詩筒酒盃徜徉自適或携杖東臯課耕織話桑麻而已世味一切無所好顧獨好書購樓貯之額曰藏書山房雖老持一卷不廢爲

文雄渾精嚴詩汎濫於韋李少陵晚喜陶孟曰取其夷曠契我心也有克齋集行於世

王以旂

王以旂字士招江寧人生而廣額豐頤音吐如鐘弱冠游膠庠才名蔚起鄉先生金公澤以右都御史掌南院解圍帶贈之正德辛未舉進士授江西上高知縣時華林賊方熾流賊復入江掠舟剽劫庫獄以旂集鄉兵於要害處徧置鐵蒺藜防之賊自是不敢窺上高已又生擒流賊數十人闔境帖然益省刑紓賦與民休息縣大治選河南道御史臺長彭澤尤器重

之每指其坐曰當拂拭待子矣出按河南省試期至會宸濠叛闖劉璟者濠黨也乃倡議罷試以旂言江西去汴遠且濠旋撲滅罷試無名遂如故事璟又傳武廟親征道出汴下牒取帑銀四萬備供應力執不可謂 天子御六飛必戒前路 勅至圖之未晚今豫發公帑萬一從他道銀散不可歸誰執其咎璟乃沮嘉靖壬午按福建時泉漳盜起流劫安溪勢日張檄分守及都指揮率兵勦之月餘平癸未予告終父養壬辰仍補河南道督北畿學政尋擢南太僕寺少卿甲午陞大理寺右少卿戊戌陞光祿寺卿八月陞



右副都御史撫治鄖陽時有議革撫治者乃繪四省
交會圖鑄之石著論言不可革狀議遂罷庚子陞左
副都御史佐院事辛丑陞兵部右侍郎是歲徐呂洪
竭漕舟滯不行被簡命督治河道至則視泉脉循
經流爲增閘若干又相地形築土壩若干漕舸得如
期達京師汶上寧陽間故有四水櫃置湖中勢豪侵
沒多獻之德邸有司因循不敢問以旂謂水櫃復庶
蓄洩有地河溢則懸河以入湖河澁則懸湖以入河
足備緩急遂任怨力復之癸卯陞右都御史掌南院
而金公澤贈帶之事於是而驗其處父母之邦也務

在持重出入屏騶從歲時歸祀必由他道謂其子曰
昔張堪步入里門可法也乙巳考察京官中外翕然
服其當是年刷卷御史以公錯叅武弁至千餘員有
旨贖罪值熱減詔至卽承德意悉蠲之丙午召
入爲工部尚書至則琉璃河圓明閣工興經營節縮
得不重費丁未二月改左都御史九月轉兵部尚書
先是陝西總督曾銑倡議復套業奉命集議俄
旨出逮銑卽命以旂代之陞辭馳入關亟罷郡縣
軍需停造器具又嚴盜馬之罰禁劫營之弊雖倉卒
建牙而能推布腹心畢屈羣策建議延安等處設游

擊一人守備四人岷州設判官一人皆得允前此哈
 密熟番久留甘肅患之召諭諸番為繕室授田示之
 生計仍約朔望族首得入關為市諸番感喻稽首聽
 命是舉不煩一夫而數十年種類一清在鎮六年北
 虜西番無大舉無深入戊申虜犯山丹巳酉犯波羅
 堡及莊浪巳又犯高家堡皆督師敗之嗣是連年破
 虜及番賊出沒境上者計斬虜六百餘級番族二百
 級奪獲夷器無算修完延慶等處城堡墩臺若干及
 蘭州邊墻二百餘里前後上功廕子者二賜金帛者
 八壬子 詔加太子太保進階光祿大夫癸丑春卒

於固原督府聞者莫不奔哭失聲諸鎮軍民為罷市
 者數日訃聞予祭九壇贈少保謚襄敏以旂賦性恬
 和事父至孝父病十年食飲起居不暫離側溷器亦
 自浣滌與鄉人處皆得其歡心雖介節凜然而無幾
 微見於顏色於宗族知舊恩義尤篤為司空入京至
 東光聞鄉友蔣淮三喪厝連窩寺時舟已踰百里亟
 命回舟留五日出俸易棺遣人護歸所著有漕河奏
 議漕河撮稿督府稿議若干卷行於世

尹鳳

尹鳳字德輝別號在竹先世直隸鳳陽縣人始祖榮



從 高皇帝起義為衛千戶以戰死進指揮同知世其官隸南府軍後衛鳳蚤孤有奇志貫穿經史諳兵法騎射舉武科鄉會皆第一榜出 上賜宴兵部命輔臣主之以儀從送歸觀者以為榮授中都留守總持廉斤斤而能察用其下省直飛輓無能先者晉提督備倭福建歲壬子帥舟師討海寇許朝恩斬首一百六十級奪還鹵掠二百四十有奇捷聞賜幣金癸丑徙僉浙江都司事秋晉叅將分守福興泉漳等處乙卯倭患起以新募兵屬之乃選驍果以軍法約束稍不中率即斬以徇於是烏合之人皆為精卒與賊

戰滸嶼東洛七礁外洋生擒二十有三人馘百七十有奇溺水死者無算己未戰梅花港中竿塘等處生擒九人馘百二十有奇奪還所虜掠亦無算是役也血戰數十親冒矢石甲不解者月餘方轉鬪海洋直糧盡輒馳島中采稗食之三日而餉至其所摧敗震赫一時捷聞復賜金幣晉長浙江都司以疾予告歸隆慶戊辰 詔舉邊材言者交口材之起長福建都司討巨盜曾一本平之捷聞復賜金幣尋奉表入賀再乞歸辛未復起浙閩壬申晉徐宿歸德叅將亾何徙守蘇松萬曆初用大司馬譚公薦召為後府都督

僉事提督中外巡徼條便宜十事上之下部覆報可
當是時所撻剔隱弊非一於掖門左藏譏防尤甚貂
璫貴戚多斂手避者時鳳年甫踰艾名聲籍甚一日
忽語家人曰乃公倦遊歸矣曩吾在行間瀕死者且
數而數以身免今至此非天幸耶天幸不可久居乃
上書固請歸日偕閭里以詩酒禪誦自娛逍遙林壑
者三十年而以病捐館舍蓋春秋七十有六矣

伊伯熊

伊伯熊字臣舉其先從海州沐陽徙於吳洪武初以
閭右實京師遂占籍上元少有文譽屢爲典文者所

器重中正德丁卯鄉試庚辰就選深州知州富民滿
存投刺請罪存嘗獲罪前守株連者甚衆深人疑將
爲前守復仇而前守適移書言深人短長伯熊謝曰
人之善惡旬日異狀能改過卽良民也對衆焚其書
深人始安前守公務弗辦府使下州督促不勝騷抑
至則懲其慢令完其稽牒不旬日而具自是無有勾
稽之擾乃節浮費均徭役招流氓辟荒萊獎黌校正
禮俗而深以大治深地錯文霸寇劫肆掠乃增城浚
堙簡士卒較騎射廣偵候山東鑛賊作亂聲張畿輔
伯熊以公事出署者驅民登城守陴賊未至而民先

疲比歸悉散遣之倡勇敢申保伍期寇至而乘城民
 便賊亦他徙州人張廷雄於貲三子者濟惡武斷持
 官吏陰事莫敢問亾何其子殺人廷自當歐殺罪而
 匿其子乾於勢家跡捕之置於法凡訟辭一覽卽洞
 情實吏畏悚莫敢舞文獄中常空諸上司有事畿內
 若清牘稽倉檢災覆獄無不事事當上意者癸未丁
 母憂服除改守祁州祁去深百餘里耳下車深人感
 德來謁無虛日守祁政尚寬簡佐以精明鎮守太監
 張某族殺人求援於張張曰知州豈冤人者耶他縣
 令嘗誤入人伯熊承委覆讞咸得直向之無理取勝

者曰伊公不可欺遂爲吐實北方力役繁三歲一易
 狡吏每得以爲奸伯熊以冊籍正之貧富有等犁然
 允當訟罰贖者多令入穀爲飲散賑貸之法卽歲稔
 亦不爲災李得四世同居榮以章服每造廬存問焉
 陳泰以粟二千石略倣義倉振鄉之不足則旌其門
 凡士大夫之貧而有守者每加禮而問之在祁三年
 以病致仕歸歸則習服氣養生之術然竟以卒將革
 不亂詢以家事曰吾得正而斃足矣夫何言

金賢

金賢字士希國初自永平徙居江寧賢性資穎敏魁



岸閔達少學易於吳公彥華之門窮探妙解有聲於時晉江蔡氏著易說行海內乃與董生林輩推衍傳授盡其精微登正德中進士歎曰聖人精蘊盡於易矣而妙用見諸行事則在春秋學者不通春秋終不達聖人之用遂取三傳及諸家之說研究異同發所未發著紀愚若干卷其自序略曰昔壺遂問於司馬遷曰孔子何為而作春秋哉自周道廢孔子知時之不用道之不行也是非二百四十二年之中以為天下儀表達王事而已矣若其誅亂臣討賊子內中國外夷狄崇仁義黜詐力尊君卑臣貴王賤伯程子所謂大義炳如日星衆人皆可得而知之學者非深於道其孰能識之哉紀愚何為而作也曰今夫山草木生之而樵者不能盡採今夫水魚鱉生焉而漁者不能盡取聖言淵微義理弘博傳者雖多而各有所得探之益深推之益廣譬之飲河者各充其腹而源不竭此紀愚所由作焉其學識其大者如此初為仁和知縣事上以誠接賓以禮御衆以義蒞事以勤文而無害寬而不弛竟以杭守楊孟瑛疏復西湖數百餘頃民賴其惠召入為兵科給事中時閹瑾擅國流毒薦紳獨持大體不亢不隨嘗勘淮安獄正知府某罪

本月分省人勿考
卷十三
南直三

明周給事自殺之寃雖拂瑾意而莫之能害他如論宗室寘鑄逆謀議圻輔平寇利害於時都御史有治軍無狀濫殺無辜者並見奏黜朝貴咸服其有識服父喪再起轉右給事中時瑾既伏誅錢寧繼起亂政以事見銜求補外避之遂出知大名府下車以後清淹禁止橫政繩長吏之桀驁辯黠盜之牽誣民以安堵乃繕城浚池興舉百度修子貢祠又以狄梁公寇萊公有惠於郡為建祠置祀刻元城劉公語錄以興學者地瀕黃河民罷障塞乃建議請疏支渠分殺其流俾無泛溢為害郡藏有籛金三千兩不登於籍吏

言之曰吾不忍厚私以負國家遂白御史籍之官入覲言官有不悅者漫詞誣劾乃改知福建延平府曰官非吾志矣不往則跡不明因之郡受事者七日即上疏乞骸不俟報而歸旋得請致仕日與朋舊為樂公卿不先加禮未嘗往見孜孜以興起後學為念講析疑義終日不倦讓舊業於諸弟子仍出歸橐之餘治其家室婚嫁其友王太僕常歿嘗貸百兩以上往哭之即曰嗟嗟欽佩毋念吾逋以恤而後於是義聲重一時嘉靖戊子大禮成推恩進亞中大夫年七十卒於家



李春芳

李春芳字子實句容人生而神穎不類凡兒常有神
龐眉鶴髮掖之行他人弗見也人益異之辛卯與計
偕歸詣海陵王良講性學復師事歐陽公德時談議
鋒出質言盈庭徐以片語剝剝各適其意歐陽大奇
之尋教授江淮屬大稜宗人幾不自存乃出所得修
脯佐給之雖在垂罄而好於急人之困丁未舉進士
太常奏對第一當久不利於公車一旦鼎貴人方燁
羨而獨循循如無有遺書戒宗人毋驕貴毋怙寵凌
物會授書內館故事多文具以此輩日侍 上左右

而情游解嫚漸以成習卽一旦筦事奈何乃立科條
教督之掖庭永巷一時煥然未幾以修撰被 旨入
內直超遷學士太常少卿賜一品緋衣蓋異數也自
後恩寵日盛由吏禮左右侍郎三遷至禮部尚書勅
叅閣務武英殿大學士已受顧命事 穆皇帝于亮
陰誅左道錄言官蠲負逋會有旨重建翔鳳樓極言
土木之費終 先皇之世海內騷然今朝政方新宜
與百姓更始而駁尋大興天下謂何 上改容謝之
竟罷工臺省應 詔上書語侵 貴人乘間泣懇
上前 上震怒幾出不測爲力言此輩朴忠無他腸

願寬其誅以開言路收人心上乃解諸帥臣言沿邊鎮垣當虜衝宜戍臺以便防守有持異議以陰壞其說者力言臺成而虜不得蹂躪長驅獨奈何惜小費不計大利乃得請至今備禦賴之虜酋唵達愛孫曰把漢那吉者以勢窮單騎來奔唵達索之急願歸亾納款貢市稱臣朝廷下其議公卿大臣廷辨不決獨倡言爲從之便數十年之市不足當一日用兵之費且歿無益之空質啟無窮之釁端則從虜爲懷柔拒虜爲失計矣上是其議虜因受我符冊歸我遁俘廟獻而市戮之邊陲按堵者數十年知經筵修實

錄大明會典

永樂大典皆爲總裁官以六載考晉

少師兼太子太師中極殿正一品俸廕中書舍人者再尚寶司丞一於是疏請歸養章七上乃得俞旨勅馳驛行人護送已又令禮部郎捧勅存問於家旣歸則角巾私第歲時伏臘羣諸子姓緋衣蟒玉奉觴尊人前間或婆娑里社從三老問年穰匱或浮白談劇巢雲終老不復與人世事卒以上壽終抑可謂功名成全孤標寡耦矣

樊鵬

樊鵬字少南其先徐州人始祖林從永樂征討功授

金吾右衛正千戶夾河戰死贈指揮同知子玉襲正千戶居應天傳四世而至鵬遭家中窘鬻菜菓以供食成嘉靖進士授安州知州多惠政陞南京戶部員外郎轉工部郎中陞陝西按察僉事兵備固原以寧夏禦虜功受白金彩幣之賜嘗為檄招撫陷虜流民邊事多所籌畫督府劉天和甚器重之以母憂歸服闋而卒著樊氏集十二卷其序初唐詩曰詩自刪後漢魏古詩為近漢魏後六朝滋盛然風斯靡矣初唐無古詩而律詩興律詩興而古詩勢不得不廢又言初唐詩如春園草木襍生含蓄渾厚生意勃勃盛唐則淘洗鋤治條理可觀生意稍薄矣鵬嘗遊於何仲默邊廷實呂仲木之門而與孟望之李子西等為詩文友故其談詩卓有所見云

楊成

楊成字全卿號水田其先楚桃源人以靖難武功隸南京留守成少而穎異稍長命業舉子即有遠志生十三喪母兼值多變益勵學晨夕罔怠弱冠遊武庠尋以世官讓其弟改遊京庠學行卓異京兆南渠王公器之嘉靖乙酉舉於鄉壬辰登進士第官南司馬部歷武庫車駕武選遷正郎蒞政京師密邇族屬嫺



黨義不違親情不弛法處之曲盡其善僉無後言名由是著庚子擢守嚴州嚴多山寡田俗尚勁悍務嗇較利下車首罷牛憑之鬻民間孕而生女恒溺殺之以省裝費宣揭厲禁多所全活癸卯居父喪哀毀骨立丙午起復守萊州時萊民阻饑皇皇迫於催科比至親爲閱災懇諸監司得蠲歲賦軍衛兵食嘗苦愆期爲籌畫以時給之兵民感切己酉擢廣西副使駐節府江夷落羣集頑悍弗馴以德率服夷酋馴化夷有欲晉謁者慨然見之不疑出謂人曰鐵面劍眉真憲相不可犯也府江用是弗擾甲寅擢四川左叅政

治益廉靜無何乃求退休雖撫按慰留諄復其歸志竟不可奪成賦性慈和儉素無嗜紛華取與必以義事庶母孝處諸弟極其友愛俸餼班諸昆季不爲私畜歸則索居歛跡以全高尚倘佯山水每喜賦咏如燈影細搖窓外月雞聲忽報屋頭霜可馳驟唐律一夕病中所賦有白石清江一酒樓黃花無語對人愁之句遂自知其不起仍扶坐析處家政縷縷至易簣時終無所亂竟以正終

殷邁

殷邁字時訓南京留守衛人生而氣貌淳靖有雅志

居恒自奮曰學不究本原徒取世資無益也嘉靖辛卯舉於鄉及入太學與何善山游因聞陽明先生緒言益自砥礪辛丑成進士授戶部主事乞南改驗封晉文選郎中出爲江西叅議擢貴州督學副使疏請致仕丁卯穆廟政元起原官視學兩浙歷江西叅政按察使四川右布政晉南太僕卿請告還癸酉復起南京太常卿尋陞禮部右侍郎丙子南大司成缺視事數月復稱疾疏再上允致仕邁自筮仕至卿貳更四十年計其在官之日僅十三前後連起皆迫而後應始以南驗封考滿如京士論擬留之北銓力辭

不就乙卯提調江西試事稱得人于浙掄士一先德行諸生中有以出妻抵証者獄久滯暴其枉釋之在太僕時同政寢弛吏因緣爲姦隨事振刷不辭煩細至典國學則申嚴功令開示名理六館士喁喁嚮風其得大體類若此初有志於學時求格致之義不得其說至哽咽終日究心中庸證諸內典已而澄思靜照久之忽有省自言一日于幽寂中恍忽見其良心始知此心虛融周遍而身內有形之心非吾心也其所得亦可窺其崖略矣平泉陸樹聲稱其坐鎮雅俗似房次律急流勇退似錢宣靖洞明宗要則楊次公

本朝分省人物考 卷十三 高用
晁大傳至其信道之篤不言而默成直無愧理學諸
儒也所著有懲忿窒慾編逍遙訣測言閒雲館野語
行於世

王 韋

王韋字欽佩南京人仕至太僕少卿父徽 憲宗朝
給事中直諫有聲韋承志執節孝德純備歷仕留署
確明職司金石不撓論詩專尚才情嘗言唐風既成
詩自爲格不與雅頌同趣漢魏變於雅頌唐體沿於
國風雅言多盡風辭則微今以雅文爲近詩未嘗不
流於宋也故其詩婉麗多致雋味難窮或者謂爲纖
弱過矣

弱過矣

許 穀

許穀上元人字仲貽嘉靖乙未會試第一初仕計部
改儀部轉天曹郎以文選遷南太常少卿尋謫浙江
運副起爲江西提學僉事仍遷南尚寶卿致仕歸家
登臨詩酒油然樂也其詩溫厚坦易無劖刻苦澁之
態後以耄壽卒於家

羅 輅

羅輅字質甫號半窻江寧縣人廣東左叅議麟之子
也生而穎悟過人博覽載籍爲文頃刻數千言立就

年二十一舉隆慶丁卯鄉試明年戊辰舉進士尋授
中書舍人己巳冊封益王世子至藩邸諸所舉行咸
中禮度竣事復命上疏懇乞就養得改南大理寺評
事至家三日父無疾而逝人以爲獲奉終養爲孝感
云癸酉起復仍補前官己卯擢江西袁州府知府首
重學校申教茂士均定民賦創立團保悉去勾攝之
擾嚴禁萍鄉之訟繕亭舍以振委候書鄉訓以化里
社積穀修城汰差減役以調劇改贛州贛當閩廣湖
湘要衝數患藁盜輅曰民無懈止奚而不盜乃禁革
冗費刑除雜差寢兩司之防夫輟各衙門之執事票

銀不充私用社學不舉前規贛中食鹽多出兩廣私
販所販之人歲餽郡吏故不能禁奏計總制歲取其
利以濟軍務遂以爲制贛郡帖然都御史盛應期言
江西劇郡莫若南昌又疏改守南昌至郡七月間太
孺人疾遂棄官西歸連疏乞休稽遲再歲銓部憐其
志復補南康郡瀕彭蠡乃創作巨堰水溢則舟人入
堰以避風濤水落則泊堰下而民居亦賴以安其他
省雇夫之銀革牙茶之弊親訊罪犯吏不能行其奸
禁止寫丁冊不能隱其弊紡績農桑男婦雙課信牌
定期鄉縣不擾尤深有益於南康者己丑擢江西按

察副使整飭饒撫兵備越七月思母復上休疏未報
還家五月而太孺人以壽終得無憾焉壬辰起復補
四川按察副使整飭建昌兵備未至移山東甫三月
擢順天府丞明年癸巳改大理少卿甲午晉宗室與
撫臣構隙上命往勘復命人皆稱平於是廷臣益
多其才兩舉節鎮未幾而卒訃聞賜諭祭春秋四十
有九

張後甲

張後甲字丁也上世爲山東滋陽人始祖林以力士
備宿衛從文皇帝北征累功至鷹揚衛指揮僉事

世其官遂家金陵後甲生而嶷峻韶秀異羣兒而體
羸善病父母絕憐愛之年十四始令就塾師則已日
誦千言茗發穎豎獄獄曹偶間矣迨補博士弟子所
屬文務根極理道不以鞿悅爲工攻苦甚造次手一
編弗置踽踽弱不勝衣劬書未嘗言欲也萬曆丙子
舉於鄉明年上公車得雋禮部庚辰成進士謁選爲
楚辰州之推官精心爲理用法平而不苛念辰民舊
苦滯獄諸所訊鞫論報窮日夜爲之案牘無宿留者
諸生某以事忤豪右文致傳獄亟釋之後以孝廉舉
民有手斃女而誣人大辟者頌繫十年往矣卒爲白

其寃五開卒戕戕長當道號號憂蠢動立走健卒逮渠魁法之其黨立解散亾譁者署篆所至必爲民計長久開社以課士積穀以備賑均徭以蘇困具可爲絮令治聲滿三楚間嘗一再分校棘園所得盡知名士爲法曹六年徵爲郎計部奉命督御馬草場往中貴與賈人多謬飭筐篋市驢因挾以穴利一切峻拒之弊乃大剗已出而監權清源清源地縮南北賈舶鱗次緩則虞畜課急則虞蹈脂潤名比至首訓商若第以實輸稅耳吾不爲淵魚察也諸商走市如鶩是歲河涸而權緩顧踰往時大司農才之復以司雲

中餉庾出納吏胥易緣輕重爲奸嚴覈之母敢上下其手又謝絕長安諸貴人之爲鹽賈關說者一時餉政修舉邊計賴焉久之以疾請告歸旣愈起補繕部時以營建徵木姦商多飭小爲鉅牟羨利至不可訾算一一引繩而程度焉中貴人數以不任斲相恟悒弗爲動居數月晉四川按察司僉事治川東時方有征播之役籌策行間機宜輒徵中客兵橫所過郡邑如螿乃以檄喻之人人啣枚而過民不知有兵也已部議移備兵於楚兩臺爲疏請得留治川北時部使者涖閩中業以入賀行有日矣乃一夕馳至立決諸

務飈發霆斷亾不中窾者賀還值歲大旱露禱而雨
隨靈川人頌之亾何擢叅議復治川東川東民間其
至爭負戴數百里迓之而竟以疾作浩然拂衣歸矣
時年甫艾耳竟以疾卒人咸悼惜之天性孝友髫年
父昭毅公病疽泣吮其血弱冠母病瘍終夜籲禱願
以已算代存鮮衣輒解以奉兄盡推先人遺產讓之
且代償其宿逋親族有急或婚葬不能舉損貲佐其
費自奉無重綺兼味任真守素泊如也生平負人倫
鑒一當賞識後皆脫穎爲理官時分校楚闈所得盡
才名士郭宗伯何閣學滿岡卿皆所手拔也居鄉未
嘗以刺通公府有緣兩造求緩頰者必正色距之顧
時時陰爲地方畫便宜事且行矣終不言其德士大
夫有慕其名造廬者財一爲報謝此外杜門却掃自
文酒賞慶外人莫能窺其面也爲人溫栗而敏練動
止有常不失尺寸至寄情玄澹夷然穆慎卽至啟手
足而神志無怛蓋其中之所寄遠矣

焦瑞

焦瑞字伯賢國初以武功隸籍旗手衛爲千夫長遂
家金陵爲人清方愿勅不妄語弱冠爲應天府學生
以家督當戶生事甚窘藉受徒爲活然來請業者束

修之問必程其學而後受有終歲不受一錢者曰教
未有益也累試不第以選貢授靈山令時一條編法
已行十餘年有司以僻遠里甲之供如故瑞至首罷
之民始灑然有更生之望縣多叢篁密箐群盜嘯聚
其中督府檄節推劉往剿之賊執劉將加害瑞率衆
往援賊見驚拜曰此真吾父母奈何犯之遽斂衆去
乃援節推而還俘斬且衆竟不上功幕府故賞亦不
及焉嶺南去天萬里仕者率取明珠翠羽以自潤漁
利之孔百端悉罷之有牛稅沿爲縣用瑞亦貯之庫
絲粟之費以月俸償之不支一錢縣產熊膽天竺黃

花石諸物上司不時需索皆力辭百姓恐失之咸願
輸以緩其怒固不從然竟其去亦無取靈山一物者
時賊猶不時興發瑞慮武備單弛檢諸兵日訓練之
以銀爲射的中輒賞之由是諸兵競勸賊不敢近見
邑士多不勤於業躬督課之日夕靡倦月試輒加賞
勵由是人人自奮權相柄國賦斂嚴急鄰郡縣爭趨
爲刻深赭衣塞道於是歎曰吾安忍以民命博一官
乎遂以疾告歸徒步辭上司不復駕靈山輿矣先是
督賦嘗出俸百金爲民代償去官未幾輸者滿額攝
者盡以返之卒不納曰吾業已心代之不忍易吾心

也歸之日囊餘八金半皆曩時射的也卒於途聞者惜之

焦 竑

焦竑字弱侯別號漪園學者稱爲澹園先生先世山東日照隸南京旗手衛籍竑生有異質聞道甚早而好學雖至老不倦幼師其兄鏡川公年十六應童子試督學趙公大奇訝之毘陵方山薛公見其文爽然稱異嘉靖甲子年廿四舉於鄉乙丑下第益淬勵身心性命之學以耿恭簡羅旰江兩先生爲師時時以古學相切劘恭簡構崇正書院遴十四郡之雋羣鼓

鑄之屬竑領其事適恭簡忤權里居擔簦入楚偕遊天臺大邕厥旨內外兼融自是以斯文爲已任屢困公車萬曆己丑始舉會試第七人 廷對臚傳第一天下咸以不愧科名歸之時司寇李司徒溫餉金爲費遣還兩公曰何得儉約至此竑曰無心爲儉但覺無事於此耳京兆欲爲樹棹楔謝以賑饑東省亦欲表於鄉里竑曰幸爲田饘粥宗人足矣授修撰讀書中秘往歲貢廷試文憊者率罷歸竑讀卷惻然曰嘻其甚也爲具言老生需次久矣一旦罷去終無路得沾升斗且廣文席卽耄居獨不能授伏生一經乎自

是老生始絕無報罷者壬辰分試禮闈所舉拔皆名流雖三場廢牘亦品騭多方曰吾無負天下士也是歲持節封周藩盡却餽遺癸巳還朝會開史局南充相公意專屬竑乃更謙讓未遑爲條四議以進然正史卒不就於是網羅四海舊聞爲獻徵錄百二十卷受書中貴往第爲具文耳竑曰此輩今之刑餘異日天子之昵近也乃取古寺人垂芳遺誠教之中貴皆湧雪自喜甲午詔簡東宮講讀官遴者僅六人竑與焉卽毅然以輔導自任嘗講次值鳥飛鳴過之偶移睿覽卽肅立輟講東宮歛容以聽然後復講取典籍中可備勸戒者繪圖演之名養正圖解神宗詳加省覽溫旨慰藉丁酉順天典試事忌者取士子牘中二三奇險語以爲壞文體調外任後事得白所司推擇爲同丞最後推南雍司業而年已七十矣生平養深性定無旁睇無倚容澹然於得失之場家居廿載如一日惟問奇之屢常滿戶外擁書數萬卷日哦咏其中有若寒生副墨之傳得其片楮剝牘爭珍襲之所著有東宮講義解易筮禹貢解考工記解老莊翼陰符經解支談焦氏筆乘續筆乘焦氏類林澹園集澹園續集澹園別集經集志俗書

後復講取典籍中可備勸戒者繪圖演之名養正圖解神宗詳加省覽溫旨慰藉丁酉順天典試事忌者取士子牘中二三奇險語以爲壞文體調外任後事得白所司推擇爲同丞最後推南雍司業而年已七十矣生平養深性定無旁睇無倚容澹然於得失之場家居廿載如一日惟問奇之屢常滿戶外擁書數萬卷日哦咏其中有若寒生副墨之傳得其片楮剝牘爭珍襲之所著有東宮講義解易筮禹貢解考工記解老莊翼陰符經解支談焦氏筆乘續筆乘焦氏類林澹園集澹園續集澹園別集經集志俗書

刊誤遜國忠節錄京學志獻徵錄詞林歷官表玉堂
叢語以泰昌元年卒得壽八十有一訃聞上念其
講幄功予祭二壇增秩官諭廕子一人入太學

王顯

王顯自號溪漁子江寧人少脫畧不拘與羣兒嬉遨
輒處其上而什伍部署之令之曰之左則趨之左曰
之右則折而右無敢過視者其父素長者常禁切之
納之學使讀書時時棄去不肯帖帖諸生間而所業
未久卽過諸生數倍諸生大畏之其師亦奇之謝曰
子非吾曹人也顯亦自雄真才志嘗往來江淮之南

結交大俠異人論古人功業遇當其意徘徊歎息仰
天拊髀若有意於從之遊也與天台林右張轂最善
右亦豪士善擊劍知兵而長於爲文轂陽狂飲酒自
放於歌詩二人皆自負高一世嬰豎視同列顯在淮
上嘗釣海濱望見二人踞坐大笑二人者知其非庸
人也卽與之語大驚異其所爲引歸逆旅主人出酒
相飲攝衣跣行起舞爲樂驩聲撼林木每辨難古今
折衷損益根抵理道識者知其非狂生或不識其爲
人共矚指笑之以爲真狂或又疑其爲神仙人云顯
舉若不聞遇適其志鮮衣怒馬行衆人中見者爭觀

之否則被污垢短衣遂躡市人後市人吁之弗辭也
後顯盡悔故所爲買書千餘卷伏而讀之爲文章奇
偉伉健然耻以自名常曰漢無儒者惟賈生諸葛孔
明唐人陸贄粗有識耳夫所貴乎學將以輔天地所
不及不然多讀書何爲識溪漁子者聞其論高愈疑
之終莫能測其爲何如士也

謝 璿

謝璿字文卿一字子象先世自贛徙家金陵璿八歲
善詩客命賦暮秋援筆立就至紫塞風寒鴈叫霜客
驚嘆呼爲奇童稍長從工部郎吳元玉學見其詩曰

深林下馬蒼苔滑野寺入門秋爽多擊節鑒賞謂雖
長宿不易逮也自是日就深博吏部侍郎柴墟儲公
爲南考功作檀園詩社引與諸文士聯句往往出奇
絕衆器局雋朗才情綺麗負氣自好不與俗伍與達
人高士論古今商文藝據案高談如倒囊櫝或酒酣
引紙命辭常屈一座兄弟四人各善詩畫風流清邁
時擬謝庭諸郎公侯貴人往候與之分庭抗禮藐不
加意每應舉率用古文字作經義累十舉不第乃擲
筆於地曰吾本不樂爲此奈何效老驥局踏車下邪
且鷓鴣其儀者立朝鹿豕其性者居野吾乃今知旣

往之誤也退耕國門之南自號野全子鄉人稱曰野全先生又以其美鬚髯行九稱曰髯九翁所著有采毫錄東村稿西遊錄在客稿日得錄廣陵雜錄湘中漫錄總若干卷臨終囑其子少南曰爾能貴圖志吾墓弗能母以士題墓門吾所厭也後少南果舉進士有才名歷官按察副使詔贈璿如其官

劉 閔

劉閔字子賢六合縣人幼有至性少長知學動循古禮造次不苟家甚貧極力養母定省溫清疾不解帶母或素怒則衣冠跪床下竟夕不敢起以父早亾與

祖母二喪不克葬遂斷酒肉遠房室訓徒鄰邑朔望則號哭於殯所如是者三年隣族憐之爲助其葬母歿哀毀骨立廬墓側衰經蔬食終其喪祭祀必齋沐率男婦奠獻亦如文公家禮閨門嚴肅妻失愛於母出之終身不復娶林少保俊起留臺疏於朝曰劉閔學行高古雖詞藻不逮而德宇道風人自難及宜徵侍青宮講讀不報御史宗彝知府陳效又薦之詔授本縣儒學訓導前後按部大夫及守令率與鈞禮時致餽以賙其乏所著有家禮考註昭穆圖宗子說五倫啟蒙孝經刊誤等書藏於家姪孫自省鄉舉歷長

沙府同知持身敦樸臨事周慎頗有閔家風

劉光

徐霖

徐霖字子仁金陵人母沈禱於南禪寺夢神僧授見有娠將誕復夢登浮屠墮而寤遂生霖廣面長耳體貌偉異機神夙解不同常見五歲日記小學千餘言七歲能賦詩九歲大書輒成體通國呼爲奇童奉母孝事兄如父各致驩愛年十四補弟子員放筆工文章聞譽益起督學御史浮梁戴公珊山陰司馬公璽每試必稱曰奇才奇才然任放不諧俗忌刻者常側目待之竟遭誣黜落霖曰已矣士固能自貴豈專在

青紫邪由是博極羣籍究作者之情嘗曰詩文以理致爲宗達斯廼登大雅否則雖金鳴錦爛但浮藻無益也故平生不易下筆但一篇成人競玩繹王公大人迎致賓禮屏障得其揮灑重於金玉聲沛夷裔朝鮮日本使臣得其書者什襲珍之武宗南巡近侍上其詞翰詔見行宮愛之兩幸其宅賜一品服及雜器命扈從還京將授美官會武皇崩竟復還不可謂非命也性好游觀聲伎之樂築快園於城東廣數十畝其中臺池館閣之盛委曲有幽况卉木四時不絕善製小令得周美成秦少游之奧又能自度曲棋


酒之次命伶童侍女傳其新聲蓋無日不暢如也所述有南京志若干卷乞下應天府給筆札繕寫進御所著有端居詠遠游紀北行稿皖游錄古杭清游麗藻堂文集快園詩文類選中原音韻註釋續書史會要以系出松自號九峯道人或稱爲快園叟或羨其美鬚髯又呼爲髯仙老貌豐潤行步似飛雖寒暑劬書不倦忽病遽逝或痛其無官然藝擅一代名震八極盡其風槩九原可瞑矣

李疑


李疑字思問居通濟門外閭巷子弟執業造其家得

粟以自給不足則以六物推人休咎固貧甚然獨好周人急金華范景淳吏吏部得疾無他子弟人殆之不肯舍杖踵疑門告曰我不幸被疾人莫舍我聞君義甚高能假我一榻乎疑謝許諾延就坐除明爽室具床褥爐竈使寢息其中徵醫視脉躬爲煮糜煉藥旦莫執其手問所苦如事親戚旣而疾滋甚不能起洩矢汗衾席臭穢不可近疑日爲刮摩浣滌不少見顏面景淳流涕曰我累君矣恐不復生無以報厚德囊有黃白金四十餘兩在故逆旅邸願自取之疑曰患難相恤人理宜爾何以報爲景淳曰君脫不取我

死恐爲它人得何益乎疑遂求其里人偕往携以歸
面發囊籍其數而封識之數日景淳竟死疑出私財
買棺殯於城南聚寶山舉所封囊寄其里人家往書
召其二子及二子至疑同發棺取囊按籍面還之二
子以米饋却弗受反贖以貨遣歸平陽耿子廉械逮
至京師其妻孕將育衆拒門不納妻臥草中以號疑
問故歸謂婦曰人孰無緩急安能以室廬自隨哉且
人命至重倘育而爲風露所感則母子俱死吾寧舍
之而受禍何忍死其妻子乎俾婦邀以歸產一男子
疑命婦事之如疑事景淳踰月始辭去不取其報人
用是多疑名士大夫咸喜與疑交見疑者皆曰善士
善士疑讀書爲文亦可觀嘗以儒舉辭不就然其行
最著云



文獻堂



其二十入二十三五
 以木饋却弗受兵曠以貨遣歸平陽耿子廉
 至京師其妻孕將育衆拒門不納妻臥草中以號
 同故歸謂婦曰大孰無緩急安能以室廬自隨哉且
 晁普云重倘育而為風露所感則母子俱死吾寧舍
 善士張龍書為文亦何贈嘗以爵舉禍不諒然其
 風景多張各士大夫知喜與張文貝張昔昔曰善士

